

1 KOLINITA

Faulo yana kiluma nagami me Kolinita 'waidie.

Tutuyanina Faulo i miamia Efeso, de'e leta i kilumi me Kolinita tovetumaganavo faifaidi. Kolinita tamu 'atamana 'ana wagava bwaikina 'awalawa Akaia 'alo Gulisi nageneye. 'Atamananina nageneye 'ifwaidi tomotoga Gukili we'e 'ifwaidi me Diu. Tomotoganidi bei i miamianiga fuedi 'ai'aiwabudi yadi kukua fuedi wata yadi 'aseta bwaikidi siwe kumaea 'waidie i 'odu'odu wata bunu 'ana nuanua sakoidi tulina tulina nuadi i 'ewadi.

Faulo yana lau'age-vuvua 'ana veluga 'waineye kumanina nagami Vala 'Atumaina i lu'ageyeni me Kolinita 'waidie. Bei i veve malamala 'aitamogana wata weta'i 6. (Folova 18:1-17) Tutuya 'ifwaidi i 'a'avana Afolosa i nago 'waidie i lau'age. Mulieta Faulo i nogai me Kolinita tovetumaganavo valadi kebu 'atumaina, wata taunidi leta i kilumi i velutoli Faulo 'waineye nani 'ifwaidi faifaidi. Faulo leta de'e nagami i kilumi i yagaidi yadi sakona faifaidi wata yadi velutoli i tutulidi. De'e letanina 'ana 'idi side bani'odi.

Vona-vekaiwa. 1:1-9

Ve'ikwayekwayega wata 'eto'idi'idi tovetumaganavo 'waidie i souyen. 1:10-4:21

Fwayafwaya 'ana nuanua sakoidi tovetumaganavo nuadi i 'ewadi. 5:1-6:20

Nagi 'ana nuanua. 7:1-40

Kebu ta na luwanawana. Keliso 'aisena 'waineye ta na vetumagana. 8:1-11:1
 Sauluva tulina tulina tovetumaganavo yadi tafalolo faifaina. 11:2-14:40
 Keliso i tovi-vaitugana wafayega wata tovetumagana i na tovoi-vaitugana. 15:1-58
 Faulo yana nuanua, yana 'alanuai wata yana velu'ase'ase. 16:1-24

¹⁻² [◊]Emavo, yau Faulo iada Sosideni taiadi 'a veikaiwa 'waimie. Yaubada nuanuana bega a vetomata'aulele Iesu Keliso faifaina, we'e 'omi Yaubada yana 'Aila'a 'wa miamianiga 'atamana Kolinita 'waineye a kilukiluma 'waimie. Yaubada i venua'ivinemi 'omi yana tomotoga mogitana wata fai Iesu Keliso taiadi 'wa miave'itubama i 'ive'atumaimi bega yami sauluva tonovidi matanye. Kebu 'aisemiga, wata tomotoga matatabuna 'awalawa tulina tulina 'waidie, kumanidiavo ma yadi subia i vevegole 'ada Toveimea Iesu Keliso 'waineye, taunina 'adi Toveimea wata 'ada Toveimea.

³ [◊]'A vevelu'ui faifaimi, nuanuama Yaubada Tamada wata 'ada Toveimea Iesu Keliso ma yadi nuakalikali i na vevesauluva 'atumaina 'waimie, wata nuanua bikadi mia 'atumaina taiadi i na velevelemei.

'Aivaita bwaikina ta veluagai Keliso 'wainega.

⁴ [◊]Tutuya matatabuna a vevekaiwa Yaubada 'waineye faifaimi, fai ma yana nuakalikali i vesauluva 'atumaina 'waimie Iesu Keliso 'wainega. ⁵ [◊]'Wa miave'itubamaga Keliso taiadi bega nani matatabuna 'waidie 'aivaita bwaikina

'wa veluagai Yaubada 'wainega 'wa da vo i da 'ive'ai'aiwabumi. Yana 'aivaitanina 'wainega yami vona faifaina matatabuna 'adi nogaya 'eba nua'ewa, wata yana nuanua tonovidi 'wa 'asetadi mogitana. ⁶⁻⁷ Keliso Valana a lu'ivoneyeniga 'waimie nuamie i 'eno'eno, wata taunimi 'wa tauyemi 'waineye, begaidi tutuyanina 'ada Toveimea Iesu Keliso yana souyagi 'wa lulukamaseni, Yaubada yana nuakalikali fuedi 'waimie i 'eno'enovi, kebu tamu nani 'wainega 'wa da ve'ale'usa 'anu'anunumi 'adi 'aivaita faifaidi. ⁸ \diamond Wata i na kikiavefa'alimi i na nagoga 'eba ve'a'ava 'waineye 'ada Toveimea Iesu Keliso yana vila-vaitugana 'ana 'aiata 'waineye kebu tamu yami sakonaga, yami sauluva matatabuna tonovidi Yaubada mataneye. ⁹ \diamond Naninidi Yaubada 'wainega ta na veluagadi fai bani'odi i vona, mogitana i na 'idewadi. Yaubadanina i venua'ivinembe bega 'wa veiana Natuna 'ada Toveimea Iesu Keliso taiadi.

Tovetumaganavo i ve'idi'idi.

¹⁰ \diamond Ekwavo, 'ada Toveimea Iesu Keliso veimea i veleku begaidi a vevelu'ui 'waimie kebu 'wa na ve'ikwayekwayega, nuanuaku matatabumi yami vona 'adi nuanua 'aitamogana bega kebu 'wa na ve'idi'idi. Wata nuanuaku yami nuanua matatabuna 'aitamogana wata nani matatabuna 'waidie yami venua'ivina i na vesala bega 'wa na luvetubama 'ami 'aila'a 'aitamogana. ¹¹ \diamond Ekwavo, bani'odi a voneyediga fai Kiloi yadi vanuga 'ana tomia 'ifwaidi i maia 'waikuye i lu'ivona

\diamond **1:8:** Fil 1:6; 1 Tes 3:13 \diamond **1:9:** 1 Ion 1:3 \diamond **1:10:** Fil 2:2

\diamond **1:11:** Fol 18:24-28, 19:1-2

'aise'avami 'wa veve'ikwayekwayega. ¹² Yami awa'idi'idi side bani'odi, 'ifwaimi 'wa vo, 'Ima Faulo yana tomotoga," 'ifwaimi 'wa vo, 'Ima Afolosa yana tomotoga," we'e 'ifwaimi 'wa vo, 'Ima Fita yana tomotoga," wata 'ifwaimi 'wa vo, 'Ima Keliso yana tomotoga."

¹³ Bani'odi 'wa vevesauluvediga kebu i da lub-waineniga. Yami awa'idi'idi 'waidiega 'wa da vo Keliso 'wa da sivo'avo'ai. 'Wa da nuani yau Faulo i tutufwaseku 'ai lagalagana 'waineye a wafa faifaimi? 'Alo 'aku wagavayega 'wa bafitaiso bega 'omi yaku tovetutuyamavo? A nuani kebu. ¹⁴⁻¹⁵ A vekaiwa Yaubada 'waineye kebu fuemi a da bafitaisomi, Kilisifasi wata Gaiasa 'aisedi a bafitaisodi, begaidi kebu tamu aitoi 'waimiega 'ana fata i na vo, Yau Faulo i bafitaisoku, yau yana tovetutuyama mogitana." ¹⁶ Wata tamu a nuani, Site-fana yana vanuga 'ana tomia taiadi a bafitaisodi, we'e a nuani kebu tamu wata aitoi a da bafitaisoi. ¹⁷ Keliso i voneku a vetofolovaga kebu bafitaiso faifaina, we'e mogitana Valana 'Atumaina a na lalau'age. Alalau'agega kebu nuanuaku tomotoga i na vo, Faulo yana lau'age 'ana nogaya ma yana 'aseta bwaikina wata 'eba nua'ewa." Kebu yaku nuanua bani'odi, nuanuaku Keliso yana wafa 'ai lagalagana 'waineye 'aiseotogina tomotoga nuadi i na 'ewadi. Fai kebu nuanuaku Valananina yana toketokena i na venani-'avo'avovo begaidi a lulu'ivonamo tomotoga 'waidie.

Yaubada yana 'aseta wata yana toketokena Keliso i sivemagesedi.

[◇] **1:14-15:** Fol 18:8 [◇] **1:16:** 1 Kol 16:15 [◇] **1:17:** 1 Kol 2:1-2,5

18 ✽ Keliso yana wafa 'ai lagalagana 'waineye 'ana vona tomotoganidi wafaotoga 'ana 'edeamo i nunagoiga, 'ana nogaya 'waidie 'wava'wavadi yadi vona. We'e 'ida 'ita'ita'i ta veveluagai ta vo, Keliso i wafaga, Yaubada yana 'eda'eda toketokena, 'ada 'ita'ita'i faifaina." 19 ✽ Tofalive'wava'wavanidi yadi 'aseta faifaina tamu vona i 'eno'eno Yaubada yana Buki nageneye, Yaubada i vo,

To'aseta yadi 'aseta a na 'ivesakodi,

Tomotoganidi nuadi magemagetadi yadi nu-anua a na 'ivetabodadi."

20 Begaidi to'aseta, tomotoganidi nuadi magemagetadi, wata tomotoganidi tutuya de'e ma yadi 'aseta i veve'ikwayekwayega, yadi 'asetanidi ava'aibe bei i nago? Mogitana, tomia fwayafwaya yadi 'aseta Yaubada i sivilai bega bani'odi 'wava'wavadi yadi 'aseta. 21 Yadi 'asetanidi i siviladiga fai Yaubada ma yana 'aseta yana nuanua i 'idewai bega tomotoga i vetumagana taunidi yadi 'aseta 'waineye kebu 'adi fata Yaubada i na veluagai. We'e mogitana Yaubada i nuani nuanuana egavo i na vetumagana Keliso Valana 'waineye i na 'ita'ita'iedi, Valananina faifaina 'a lalau'age we'e tomia fwayafwaya fuedi yadi nuanua igodina 'wava'wavadi yadi vona. 22 ✽ Tofalive'wava'wavanidi me Diu, nuanuadi 'eba nuavogana wata 'eba nua'ewa i na 'isedina mulieta i na ve'awamogitana. We'e me Guliki i falive'wava'wavaga nuanuadi vona ma 'adi

✽ 1:18: Lom 1:16 ✽ 1:19: Ais 29:14 ✽ 1:22: Mad 12:38; Fol 17:18

'aseta wata 'eba nua'ewa i na nogaidi mulieta i na ve'awamogitana. ²³ We'e 'ima 'a lalau'age Keliso i wafaga 'ai lagalagana 'waineye tomotoga 'ada 'ita'ita'i faifaina, siwe me Diu i nogai i nuani wafanina 'ana 'isa sakoina nika i bunumayaga i baila, mali tomotoga i nogai i vo, 'A baila, 'ana nogaya 'waimeye 'wava'wavadi yadi vona." ²⁴ We'e tomotoganida Yaubada i venua'ivinedaga bega 'ita'ita'i ta na veluagai, me Diu wata mali tomotoga taiadi, 'waideye Keliso taunina Yaubada yana toketokena wata yana 'aseta. ²⁵ Tomotoga igodi to'aseta i vo, Yaubada Natuna i 'anivelenen i wafa 'waineye 'ana 'isa i ve'wava'wava," siwe Yaubada yana nuanuananina tomotoga yadi 'aseta i vebwaika-'iawedi. Wata tomotoganidi i vo, Yaubada mweana, Natuna i wafa 'ai lagalagana 'waineye," siwe Yaubada yana mweananina toketokeotogina, kebu bani'odi tomotoga yadi toketokena.

Kebu tamu aitoi 'ana fata taunina i na awa'ai'aia Yaubada mataney.

²⁶ [✖]Ekwavo, 'wa na nuani tutuyanina Yaubada i venua'ivinem i 'wa vetumagana Keliso 'waineye, tomotoga matadie to'aseta kebu fuemiga, tovetoketoke kebu fuemiga, wata to'ai'aiwabu kebu fuemiga. ²⁷ We'e mogitana tomotoganimi faifaimi tomia fwayafwaya i vo, Yadi sauluva 'wa da vo 'wava'wavadi yadi sauluva bani'odi," siwe Yaubada i venua'ivinem bega igodi to'aseta i na vedi yadi nuanuananina vekali nika i na bunumayaga. Wata bani'odi tomotoganimi

[✖] **1:26:** Mad 11:25

mweami tomia fwayafwaya matadie, siwe Yaubada i venua'ivinem bega tomotoga toketokedi i na vedi yadi toketokenanina nani-'avo'avovo nika i na bunumayaga.

²⁸ ◊Tomotoga-'avo'avovo, naninidi tomotoga i awaobuobuyediga, wata nani siaidi, Yaubada i venua'ivinedi bega 'waidiega naninidi tomotoga matadie bwaikidi i na venani-'avo'avovo. ²⁹ Nani de'e Yaubada i 'idewaiga begaidi kebu tamu aitoi 'ana fata taunina i na awa'ai'aia mataneyeye.

³⁰ ◊We'e 'omi Yaubada i miemi Keliso 'waineye taiadi 'wa miave'itubama, bega Kelisonina 'asa'aiana yada 'aseta, nika 'wainega 'ada fata ta na venua'ivina-'atumai. Wata Keliso yana wafa 'wainega Yaubada i 'ive'atumaimi bega 'omi yana tomotoga mogitana yami sauluva matatabuna magemagetadi, wata Kelisonina 'wainega Yaubada i tuveobumi sakona 'wainega.

³¹ ◊Fai naninidi 'atumaidi Yaubada i 'idewadi Keliso 'wainega begaidi ava'ai i voneyeniga Yaubada yana Buki nageneye ta na 'idewai i vo,

'Ai'edi aitoi i na vo, A na subia,"

I lubwaineni 'Auvea 'aisena i na subiai,
Kebu taunina i na awa'ai'aia."

2

Keliso yana wafa 'ai lagalagana 'waineye nani bwaikaotogina.

¹ ◊Ekwavo, basenadi a wai 'waimie a lau'agega Yaubada Valana 'ada 'ita'ita'i faifaina, bonaku

◊ **1:28:** Iem 2:5 ◊ **1:30:** Lom 3:22; Efe 1:7 ◊ **1:31:** Iel 9:24;
2 Kol 10:17 ◊ **2:1:** 1 Kol 1:17

'ana nogaya kebu 'eba nua'ewa wata yaku lau'age kebu vitadiga. ² Yaku vonanidi safailidiamo a nago fai yaku nuanua a 'idewai bega tutuyanina taiadi ta miamia kebu tamu nani faifaina a da nuanua, 'aiseotogina Iesu Keliso faifaina a nuanua, we'e mogitana yana wafa 'ai lagalagana 'waineye nani bwaikaotogina 'waikuye. ³ Tutuyanina a wai-vauvau 'waimie yau kebu toketokekuga, wata ma yaku kololo a tatava. ⁴ \diamond Yaku lau'age wata ava'ai faifaina a lalau'agega, 'adi nogaya kebu 'eba nua'ewa 'alo kebu bani'odi tomia fwayafwaya yadi 'aseta, siwe Yaubada 'Anu'anununa yaku vonanidi i kiavetoketokedi, yami 'eba 'isa a vonavona mogitana. ⁵ A lau'agega 'Anu'anunu 'Atumaina yana toketokena 'wainega bega yami vetumagana Keliso 'waineye 'wa veluagai, kebu tomotogaotoga yadi 'aseta 'wainega, we'e mogitana Yaubada yana toketokena 'wainega.

Yaubada yana nuanua 'ase'asetana.

⁶ 'Wa na vo 'ako yau kebu to'asetaga, siwe tovetumaganavo i kumaga 'waidie 'eba 'aseta mogitana a lulu'ivona. 'Asetanina kebu tutuya de'e 'ana tomotoga yadi 'aseta bani'odiga 'alo yadi toveimeavo yadi 'aseta bani'odi, toveimeanidi yadi toketokena imweamwea sai'afoga i na 'a'ava. ⁷ \diamond 'Eba 'aseta faifaina a vonavona Yaubada yana nuanua givagivana wata 'ase'asetana. Basenadiotoga Yaubada bola kebu fwayafwaya i da 'idewaiga yana nuanua 'ase'asetana i 'idewai. Yana nuanuananina 'wainega i 'ive'ai'aiwabuda,

\diamond **2:4:** 1 Tes 1:5 \diamond **2:7:** Kolos 1:26

siwe i giveni tomotoga 'waidiega. ⁸ ✡Tutuya de'e toveimeanidi 'waidiega kebu tamu aitoi Yaubada yana nuanua 'ase'asetana i da 'asetai, i da 'asetaiga 'ako kebu 'ada Toveimea Magemagetana i da tutufwaseni 'ai lagalagana 'waineye. ⁹ ✡Yaubada yana nuanua givagivana wata 'ase'asetana a lulu'ivoneyeniga, faifaina tamu vona i 'eno'eno Yaubada yana Buki nageneeye i vo,

Ava'ai Yaubada i 'idewadiga 'ana tonuakalikali faifaidi, 'atumaiotogidi,

Kebu tamu aitoi i da 'isedi wata kebu tamu aitoi i da nogaidi.

Naninidi 'atumaiotogidi faifaidi tomotoga i nuanua-wayoga.

¹⁰ We'e 'ida yana nuanuananina 'waideye i sivemageseni 'Anu'anununa 'wainega. I sivemageseniga fai 'Anu'anunu 'Atumaina nani matatabuna 'waidie i susula, siwe wata Yaubada yana nuanua givagivadi wata 'adi 'aseta vitadi 'waidiamo i nago. ¹¹ Kebu aitoi 'ana fata tamu tomogo yana nuanua i na 'asetadi, tomotoganina 'anu'anununa 'aiseotogina 'ana to'aseta. Wata bani'odi kebu tamu aitoi 'ana fata Yaubada yana nuanua i na 'asetadi, 'Anu'anununa 'aiseotogina 'ana to'aseta. ¹² ✡We'e 'ida Yaubada 'Anu'anununa i tauyen'i ageda, kebu tamu 'anu'anunu tulina ta da 'ewai fwayafwaya de'e 'wainega, we'e mogitana 'Anu'anunu 'Atumaina naninidi Yaubada i 'anivelenediga 'waideye, i sivemagesedi nika ta 'asetadi.

✡ 2:8: Luk 23:34; Fol 13:27 ✡ 2:9: Ais 64:4 ✡ 2:12: Ion 16:13

¹³ Yaubada yana nuanua 'ase'asetadi faifaidi 'a lulu'ivona, yama vonanidi kebu 'a da 'ewadi tomia fwayafwaya 'waidiega, we'e mogitana 'Anu'anunu 'Atumaina yana aware'eda'eda 'wainega, Yaubada yana nuanua tonovidi 'a lulu'ivoneyedi tomotoganidi 'Anu'anunu 'Atumaina i agediga 'waidie. ¹⁴ \diamond We'e tomotoganidi Yaubada 'Anu'anununa kebu i da agediga, i baila kebu nuanuadi 'Anu'anununina yana 'anivelena i na 'ewadi fai 'waidie nani'ayo'avovo. Kebu 'adi fata naninidi i na 'asetadi fai 'Anu'anunu 'Atumaina 'aiseotogina 'ana fata i na kiavemagetadi. ¹⁵ Tomotoganidi 'Anu'anunu 'Atumaina i agediga 'adi fata nani matatabuna i na venua'ivinedi, ava'aibe 'atumaina, wata ava'aibe sakoina. We'e tomia fwayafwaya 'waidiega kebu tamu 'ana fata tovetumagananidi yadi 'aseta wata yadi toketokena i na nuaveluagai ava'aiega i mai. ¹⁶ \diamond Tomia fwayafwayanidi 'Anu'anunu 'Atumaina kebu i da agedi i bavuga, faifaina tamu vona i 'eno'eno Yaubada yana Buki nageneeye i vo,

Kebu tamu aitoi 'ana fata tauni'avana 'Auvea yana nuanua i na 'asetadi,

Wata kebu 'ana fata i na aware'ede'edeni."

We'e 'ida Yaubada 'Anu'anununa i agedaga, nudaye Keliso yana nuanua i 'eno'enovi.

3

Me Kolinita bola, kebu i da vetoketoke.

¹ \diamond Ekwavo, 'omi bani'odi kwakwama, yami vetumagana Keliso 'waineye mweadi, bola

\diamond **2:14:** 1 Kol 1:18 \diamond **2:16:** Ais 40:13 \diamond **3:1:** Ibu 5:12-13

kebu i da vetoketoke. Yaku vona 'waimie kebu bani'odi tomotoganidi i tauyediga 'Anu'anunu 'Atumaina 'waineye 'adi vona, we'e mogitana tomotoganidi fwayafwaya 'ana nuanua 'waidie bola i vevetoketoke 'adi vona a velemi.²⁻³ Kwakwama mwedamwedalidi nuanuadi susu'ava, 'ani'ani fa'alidi kebu 'adi fata. 'Omi bani'odi kwakwamanidi, Iesu 'ana veifufu 'adi 'aseta vitadi bani'odi 'ani'ani fa'alidi igodi a da velemi, siwe kebu 'ami fata yami vetumagana mweana, begaidi ve safailidi 'wa da vo susu'ava a velemi. Tutuya de'e 'ani'ani fa'alidi kebu 'ami fata fai bola fwayafwaya 'ana nuanua bwaikina i 'eno'eno 'waimie. I vebwaikaga fai tauni'avami 'wa veve'unumagigi wata 'wa awa'idi'idi ve'ikwayekwayega 'waidiega, 'eba 'isa fwayafwaya 'ana sauluva 'waidiega 'wa vevesauluva. Yami sauluvanidi Yaubada 'ana tobavu yadi sauluva 'wa saladi. ⁴ Fai 'wa veve'ikwayekwayega 'ifwaimi 'wa vo, 'Ima Faulo yana tomotoga," we'e 'ifwaimi 'wa vo, 'Ima Afolosa yana tomotoga." 'Wa 'iseni, Yaubada 'ana tobavu 'wa vevetutuyamedi.

Yaubada yana Vona 'ana tolau'age bani'odi to-bakula

⁵ Afolosa wata yau Faulo kebu tomotoga bwaikima, awale faifaima 'wa 'eto'idi'idi? 'Ima Yaubada yana tofolovavo, ava'ai folovaga i velevelema siwe 'asa'aiana 'a 'i'idewadi, yama folovanina 'wainega 'wa vetumagana Keliso 'waineye. ⁶ [✡]Yama folova bani'odi bakula 'ana sauluva. Yau Yaubada yana Vona tomotoga

nuamie a bakulidi, Afolosa to'isave'avina, we'e Yaubada taunina 'adi tokiavebwaika. ⁷ Tobakula wata to'isave'avina kebu tomotoga bwaikidi, Yaubada 'aisena bwaikaotogina, taunina tokiavebwaika. ⁸ Tomogonina Yaubada yana Vona 'ana tobakula, wata tomogonina to'isave'avina yadi folova 'aitamogana. Tomotoganidi 'aitamogana 'aitamogana 'adi tutula i na veluagadi Yaubada 'wainega yadi folova 'adi 'isa'isa bani'odi. ⁹ ✰'Ama 'ailuga Yaubada 'ana folova-vaita taiadi 'a folofolova, we'e 'omi yana tanoga.

Yaubada yana Vona 'ana tovevo bani'odi to'aiyogona.

Wata 'omi Yaubada 'ana 'a'aiyogona. ¹⁰ Yaubada ma yana nuakalikali i veku bega yau bani'odi to'aiyogona ma yana 'aseta. Tutuyanina Yaubada yana Vona a lau'age 'waimie, bei yaku folova i velamu, 'wa vetumagana Iesu 'waineye 'wa da vo Yaubada yana vanuga 'ana 'unututu a da vetovoia. Tutuya de'e mali tovetumaganavo yadi ve 'waidiega vanuganina 'omi luluna i 'iyogoyogonimi 'unututunina 'waineye. Siwe to'aiyogonanidi i lubwainedi yadi folova i na 'i'isave'avinidi i na folova-dewa, ve tonovidi wata mogitana bani'odi folova fa'alidi 'waidiega i na 'aiyogona. ¹¹ ✰'Ami 'unututu 'akonadi i tovotovoi, taunina 'asa'aiana Iesu Keliso, yada vetumagana lamuna. Kebu tamu aitoi 'ana fata tamu 'unututu tulina i na vetovoia, Keliso 'aiseotogina Yaubada yana vanuga 'ana 'unututu.

12 'Unututunina 'waineye tomotoga 'ifwaidi i 'a'aiyogona folova fa'alidi 'waidiega bani'odi golida, siliba wata kileu 'aninamanamalidi 'adi tutula bwaikidi, 'waidiega. We'e 'ifwaidi nuuanuadi folova-'avo'avovo bani'odi welavi nuvanuvadi, 'ayalele, wata danidani. ¹³ \diamond 'Awaie Vonayavuga 'ana 'Aiata 'waineye tomotoga 'aitamogana 'aitamogana yada folova 'adi mogitana Yaubada i na sivemagesedi 'ai-'ala'alata 'wainega, yana 'ainina 'wainega yada folova i na sitonovidi 'atumaidi 'alo sakoidi. ¹⁴ 'Ai'edi aitoi i na 'aiyogona 'unututunina 'waineye we'e yana folova kebu i na 'ala'a'avaiga, taunina tutula i na veluagai. ¹⁵ 'Ai'edi aitoi yana folova i na 'ala'a'avadi, tomogonina 'ana tutula Yaubada i na ve'o'oleni, siwe fai taunina tovetumagana 'ita'ita'i 'aisena i na veluagai 'wa da vo tamu tomotoga nima'ava'avana i da dega 'ai-'ala'alata 'wainega.

'Omi Yaubada yana vanuga 'eba velu'ui.

¹⁶ \diamond 'Wa da vo kebu 'wa da 'asetai, 'omi Yaubada yana vanuga 'eba velu'ui, 'Anu'anununa nagemie i miamia. ¹⁷ 'Ai'edi aitoi Yaubada yana vanuganina i na kiavebe'uya bega i na sakona, wata Yaubada tomogonina i na 'ivesakoi. I na 'ivesakoiga fai yana vanuganina magemagetana, 'omi 'asa'aiana yana vanuganimi.

Yaubada nani matatabuna i veleda 'ada 'aivaita faifaidi.

¹⁸ 'Ai'edi tamu aitoi 'waimiega i na vo, Yau to'aseta tomotoga matadie," yana vonanina 'ana

\diamond 3:13: 1 Kol 4:5 \diamond 3:16: 1 Kol 6:19

nogaya vekali. Igodina ma yana 'aseta siwe i lubwaineni 'asetanina i na baileni, ma'itufa Yaubada yana 'aseta i na 'ewai. I na 'ewaiga nika ma yana 'aseta mogitana siwe tomotoga i na 'iseni i na fali'wave'waveni. ¹⁹ [✡]Taunina yana 'aseta i na baileniga i lubwaineni fai Yaubada mataneye tomia fwayafwaya yadi 'aseta nani-'avo'avovo. Tomotoganidi igodi to'aseta 'adi vona i 'eno'eno Yaubada yana Buki nageneeye i vo,

To'aseta yadi 'aseta Yaubada i sisiviladi, 'waidiega ilagi i veveluagadi."

²⁰ [✡]Wata tamu vona i 'eno'eno i vo,
'Auvea to'aseta yadi nuanua i 'aseta'a'avadi,
Yadi nuanuanidi nani-'avo'avovo mataneye."

²¹ Fai tomotoga yadi 'aseta nani-'avo'avovo Yaubada mataneye, 'wa subisubiadiga 'asa'aiana 'wa na 'ailove. Yami to'edakumetavo tulina tulina 'wa awa'ai'aidi, siwe kebu i da lubwainemi, to'edakumetanidi matatabudi 'ami to'aivaita. To'edakumetanidi nani matatabuna fwayefwayeye taiadi 'omi faifaimi. ²² Afolosa, Fita wata yau Faupo matatabuma 'omi faifaimi, wata bani'odi fwayafwaya, yami mia wata yami wafa, naninidi tutuya de'e i 'eno'enovi wata naninidi 'awaie i na souyediga, matatabuna 'omi faifaimi. ²³ 'Omi Keliso faifaina, we'e Keliso Yaubada faifaina.

4

*Yaubada 'aisena tovenua'ivina ava'aibe
'atumaina wata ava'aibe sakoina.*

[✡] **3:19:** Iob 5:13 [✡] **3:20:** Same 94:11

¹ Side bani'odi 'wa na nuanuayed faifaima. 'Ima Keliso yana tofolovavo, Yaubada yana nuanua givagivadi 'adi to'isave'avinavo, bega a na lulu'ivoneyedi 'waimie. ² 'Akonadi 'wa 'asetai to'isave'avinavo i lubwainedi ma yadi dumwebika yadi toveimea yana nuanua i na 'i'idewadi. ³ 'Ai'edi 'wa na venua'ivina yau to'isave'avina 'atumaiku 'alo sakoiku, 'waikuye kebu nani bwaikina. Wata bani'odi 'ai'edi mali tomotoga i na venua'ivina faifaiku, kebu tamu ava'ai. Yau wata kebu a da vevenua'ivina tauniku faifaiku yaku folova 'atumaina 'alo kebu, i na nunago a na vekali. ⁴ 'Aku vebae 'waineye a lutonovi yaku folova matatabuna 'waineye kebu a da sakonaga, siwe 'aku vebaenina 'wainega kebu 'ami fata 'wa na 'asetai a vona mogitana 'alo kebu. 'Ada Toveimea Iesu 'aiseotogina i 'asetaku yaku sauluva 'adi tovenua'ivina. ⁵ Begaidi kebu i da lubwaineni tamu tomogo yana sauluva faifaina 'wa na venua'ivina. Tutuyanina 'ada Toveimea Iesu i na vila-vaitugani naninidi givagivadi dudubala nageneye wata tomotoga yadi nuanua givagivadi i na sivemagesedi. Tutuyanina 'waineye tomotoga 'aitamogana 'aitamogana 'ana subia i na veluagai Yaubada 'wainega yana sauluva 'adi 'isa'isa bani'odi. Begaidi tutuya de'e kebu aware'atumai 'alo awavesako 'ana tutuya, 'awaie Keliso nani matatabuna i na sivemagesedi 'ada fata bei ta na venua'ivina.

Faulo i talaboda, me Kolinita kebu taunidi i na awa'ai'aidi.

⁶ Ekwavo, a vonaga a vo, Yau wata Afolosa yami to'isave'avinavo, Yaubada faifaina 'a

folofolova 'waimie," wata a vo, Kebu ta na venua'ivina mali tomotoga yadi sauluva faifaidi." Vonanidi wata yaku vona 'ifwaidi 'adi 'aseta faifaina, yau wata Afolosa a awatalatutulema nika nuami i na magetadi. A awatalatutulemaga nuanuaku tamu yada vona 'wa na 'aseta-'atumaia vonanina i vo, Veimea tonovidi kebu 'wa na bailedi." 'Ai'edi veimea tonovidi 'wa na vematakeyakediga, kebu taunimi 'wa na awa'ai'ami 'ami to'edakumetavo faifaidi, we'e mali to'edakumetavo 'wa na awaobuobuyedi.

⁷ Kebu tamu aittoi i da kialakaimiga we'e awale taunimi 'wa awa'ai'ami? Nani matatabuna 'waimie i 'eno'enovi Yaubada yana 'anivelena, kebu tamu nani taunimi nimamiega i da souyeni, we'e awale taunimi 'wa awa'ai'ami 'wa da vo naninidi taunimi 'ami 'idewadewa.

⁸ [☆]'Omi me Kolinita 'ami 'isa. Igodi yami nuanua 'wa vo, 'Ima 'akonadi 'ama fata nani matatabuna 'waidie, 'ai'aiwabu bwaikina 'a veluagai. 'Ima 'a ve-kini ma yama veimea." De'e bani'odi 'wa vonevoneyediga, igodi 'wa na vebwaika-'iawema siwe 'ai'edi mogitana 'omi tomotoga bwaikimi Yaubada mataneye yau a da sosoana bwaikina nika 'omi, wata 'ima taiadi ta da veveimea.

⁹ 'Ana 'isa 'waikuye Yaubada i veimea 'ima tomata'aulele 'a vemuliotoga. Basenadi tolugavia 'adi gaviavo i 'i'ive'avinidi i lulu'ivevenedi tomotoga matadie bega i na 'isadewadi mulieta i luluvewafadi. Wata 'ima bani'odi mali tomotoga i kumekumeta we'e 'ima i vevemuliema, anelose wata tomia fwayafwaya matatabudi i 'i'isadewama 'wa da vo 'a da nunago 'a na

wafa. ¹⁰ Keliso faifaina 'a vetofolova begaidi mali tomotoga i fali'wave'wavema, we'e 'omi Keliso yana tomotoga, igodina yami 'aseta bwaikina. 'Ima tomotoga mweama we'e 'omi igodina toketokemi. Mali tomotoga i awaobuobuyema we'e 'omi igodina ma 'ami ve'ililibu. ¹¹ [◊]Basenadi wata 'asiau 'a laselase wata 'anigoma i lalala, 'ama kaleko 'anilabulabu'idi, tomotoga i nikenikema wata kebu yama vanuga 'a miayaba-vuvua. ¹² [◊]'A toke 'a folofolova nimamega taunima 'ama 'aivaita faifaina. Tomotoga i yagayagaima we'e 'ima faifaidi 'a vevelu'ui Yaubada i na vesauluva 'atumaina 'waidie, i 'i'ivekokovima, siwe 'a totokemaigema. ¹³ Tomotoga i awavesakoyema, we'e 'ima vona bikadiega yadi vonanidi 'a tutulidi. Mogitana 'ima bani'odi 'ula'ula wata yogo tomotoga matadie.

Faulo i vo, Me Kolinita natukwavo.”

¹⁴ De'e bani'odi a vonevoneyediga yaku kiluma 'wainega, kebu a da vo, A na 'ivebunumayagidi," we'e mogitana fai 'omi bani'odi natukwavo a nuakalikaliemi bega nuanuaku a na awave'ede'edemi ve tonovidi 'waidiega. ¹⁵ Avinodi 'ami to'isave'avinavo fuedi i veve 'waimie Keliso faifaina, siwe tamamiavo kebu fuediga. Yau 'aiseotogiku tamami fai a kumeta a lau'age 'waimie Iesu Keliso Valana 'Atumaina faifaina nika 'wa vetumagana 'wa luku yana 'Aila'a nageneye 'wa da vo a da venatunemi. ¹⁶ [◊]Fai yau tamami a na vonemi, nuanuaku 'wa na salaku. ¹⁷ [◊]Fai nuanuaku 'wa na salaku Timoti

[◊] **4:11:** 2 Kol 11:23-27 [◊] **4:12:** Fol 18:3; Luk 6:28 [◊] **4:16:** Fil 3:17 [◊] **4:17:** Fil 2:22

a voneni i na wai 'waimie. Taunina natuku Keliso yana 'Aila'a 'waineye a nuakalikalieni, dumwena bikana 'ada Toveimea yana nuanua i 'i'idewadi. A vetuneiga 'ami tolinuata'i faifaina, i na vonemi 'wa na nuani yaku mia 'ivauna Iesu Keliso 'waineye 'ana sauluva, sauluvanidi faifaidi a veve tovetumaganavo 'adi 'aila'a tulina tulina 'waidie, 'awalawa matatabuna 'waidie.

¹⁸ 'Ifwaimi ma yami fwausa taunimi 'wa awa'ai'aimi 'wa vo, 'A nuani Faulo kebu i na mai, i kololoyema." ¹⁹ Siwe 'ai'edi 'Auvea i na tauyekuga sai'afoga a na wai tomotoganidi i awa'ai'aidiga a na 'isedi a na 'asetadi ma yadi toketokena i folofolova 'alo 'awa'avadi i vonavonamo. ²⁰ [✳]A na 'asetadi fai 'ida Yaubada i veveimeyedaga yada toketokena i velevedea, kebu 'awa'avada i da vonavonamo. ²¹ Taunimi 'wa na venua'ivina ava'ai nuanuami. Nuanuami a na wai vematavuloga a na veleme yami sauluva sakoidi faifaidi, 'alo nuanuami nagami yami sauluva 'wa na 'ive'atumaidi mulieta ma yaku nuakalikali a na wai bonaku bikanega a na vonemi?

5

Tovetumagana nuanuana sakona, 'ana veugauga.

¹ Tamu vala i lulu'ivona-vuvueni a nogai, tamu tomogo tovetumagana 'ami 'aila'a 'wainega yana sauluva sakoiotogina. Tomotoga fuedi Yaubada 'ana tobavu taiadi sauluvanina i talaboden'i kebu bani'odi i na 'i'idewai, we'e tomogonina taunina tovetumagana siwe madiana, tamana

[✳] **4:20:** 1 Kol 2:4

yana vavine taiadi i 'eno'eno. ² Awale taunimi 'wa awa'ai'aimi, we'e mogitana i lubwainemi 'wa da nuavita bwaikina, wata tosakonanina 'wa da veugeugeni 'ami 'aila'a 'wainega. ³ Yau tulikuye a miamia siwe a nuanuanimi. 'Ada Toveimea Iesu veimea i veleku bega 'akonadi a veimea tosakonanina vematavuloga i na veluagai 'wa da vo taiadi ta da miamia a da vona. ⁴⁻⁵ \diamond Tutuyanina 'wa na va'autaga yau yaku nuanua taiadi 'wa na vava'auta, 'ada Toveimea Iesu yana toketokena 'wainega tosakonanina 'wa na 'aniveleneni Seitani 'waineye. 'Wa na veugeugeniga i na nago Seitani nimaneye vita fuedi 'waidiega voke yana nuanua sakoidi i na 'a'ava bega 'aiatanina 'ada Toveimea Iesu i na vila-vaitugani, 'anu'anununa 'ita'ita'i i na veluagai.

Tovetumagana i sakosakona kebu taiadi 'wa na miave'itubama.

⁶ 'Wa awa'ai'aimi 'wa vo 'Ima 'atumai'avama," siwe kebu i da lubwainemi. 'Wa na nuani, isita nani siaina siwe falawa matatabuna 'waineye i sususula i vevebwaika. Wata bani'odi tomogo 'aitamogana yana sakona siwe i na tunuvelevalelemei.* ⁷ \diamond Naninina sakoina 'wa na 'ewayavuleni nika yami sauluva 'atumai'avana nagami bani'odi, kebu tamu yami sakonaga. 'Wa na ve'atumaiga fai Keliso yami sakona i 'u'umidi.

Basenadi Itifita 'waineye me Diu 'ita'ita'i i veluagai 'aisaya sifi dayagidi 'waidiega. Anelose dayaganidi i 'isedi yadi vanuge, kebu

\diamond **5:4-5:** 1 Tim 1:20 * **5:6:** Bani'odi walabo 'aluna, nani siaina siwe 'ana fata 'aisayanina matatabuna i na 'ivesakoi. \diamond **5:7:** Sou 12:21; Ion 1:29

i da luvewafadi i uvi'agalatagonidi. Begaidi Uvi'agalatagona 'ana sakali 'waineye me Diu sifi natudiavo i nikenikedi 'ana 'leba nuave'avina. Wata bani'odi Iesu, taunina Yaubada yana Sifi Siaina, i wafa yada sakona 'adi nuatavuna faifaidi.

⁸ ◊Sakalinina i na velilivana me Diu beledinidi i kabunidiga isita taiadi i tawetawedi, ma'itufa beledinidi i kabunidiga falawa'ava 'wainega ma yadi sosoana i 'ani'anidi. Wata 'omi bani'odi, kebu sauluva sakoidi 'wa na luwanawanadi yami sauluva 'atumaidi taiadi, i lubwainemi yami mia matatabuna 'waidie ma yami sosoana Keliso yana wafa 'wa na nuanuani, wata yami nuanua yami sauluva taiadi tonovi'avadi.

⁹ Basenadi tamu leta a kilumi i wai a vonemi a vo, Tove'avula-'avo'avovo kebu taiadi 'wa na miave'itubama." ¹⁰ Siwe Yaubada 'ana tobavu i sakosakonaga kebu faifaidi a da vonavona. Tobavunidi i veve'avula-'avo'avovo, i luluve'ove'o'olagi, i vavainago, wata yaubada-vekavekali i subisubiadi. 'Ai'edi nuanuami tomia fwayafwaya sakoidi matatabudi 'wa na bailedig, ava'aibe 'wa na nagoi? 'Wa na vo, 'A na bailedi," fwayafwaya de'e 'wa na 'iaweni. ¹¹ ◊We'e mogitana yaku vona 'ana 'aseta side bani'odi. 'Ai'edi aitoi i na vo, Yau a vetumagana Iesu 'waineye," siwe i na veve'avula-'avo'avovo, i na luluve'ove'o'olagi, yaubada-vekavekali i na subisubiadi, i na vevebonaivo, ufa toketokena i na toke i na yemuyemu, 'alo i na vavainago, tomotoganidi bani'odi, faifaidi a vonavona. Kebu taiadi 'wa na miave'itubamaga wata kebu 'wa na tayegidi 'ani faifaina.

◊ 5:8: Sou 12:15 ◊ 5:11: Efe 5:3,7

12-13 Tomotoganidi kebu i da vetumagana Iesu 'waineye yadi sauluva faifaidi kebu a na vo 'atumaidi 'alo sakoidi, kebu yaku 'eba veimea, Yaubada 'aisena i na veimea 'adi vematavuloga faifaina. We'e 'omi ma yami veimea tovetumagana 'waidie. I lubwainemi 'ami fata emiavo tovetumagana i na sakonaga 'wa na veimeyedi 'adi vematavuloga faifaina. Tamu vona i 'eno'eno Yaubada yana Buki nageneye 'wa na vetutuyameni i vo,

'Ai'edi tamu aitoi Yaubada yana 'Aila'a nageneye i na sakosakonaga, 'wa na veugeugen.

Wata 'omi me Kolinita i lubwainemi tomogonina i sakosakona tamana yana vavine taiadi 'wa na veugeugen.

6

Tovetumagana yadi vonayavuga faifaina.

1 Ekwavo, tamu yaku nuanua side bani'odi. 'Ai'edi tamu 'ami 'aila'a ma iana tovetumagana'ava taiadi i na ve'ikwayekwayega, kebu tamu sai'af o i da lubwaineni ve'ikwayekwayeganina faifaina iana i na naweni 'eba vonayavuga 'waineye. I na naweniga Yaubada 'ana tobavu yadi toveimea 'waidie vonayavuga faifaina kebu i da lubwaineniga. We'e mogitana, 'ai'edi i na ve'ikwayekwayega i lubwainedi i na vonayavuga Yaubada yana tomotoga matamie nika 'omi 'wa na veimea naninina faifaina. **2** 'Wa da vo kebu 'wa da 'asetai, 'awaie tomia fwayafwaya matatabudi i na vonayavuga 'omi Yaubada yana tomotoga matamie 'wa na veimeyedi. Fai 'ami fata tomia

fwayafwaya matatabudi 'wa na veimeyedi vonayavuga 'waineye, mogitana tutuya de'e 'ami fata nani siaidi faifaidi 'wa na veveimea. ³ Wata 'wa da vo kebu 'wa da 'asetai, 'awaie anelose i na vonayavuga matadeye ta na veimeyedi yadi sauluva faifaidi. Fai folovanina bwaikina 'wa na 'idewai abame, mogitana naninidi i sousouyedi fwayefwayeye yada mia faifaidi, 'ami fata 'wa na veveimea. ⁴ Begaidi 'ai'edi 'ifwaimi 'wa na ve'ikwayekwayega naninidi i sousouyediga faifaidi, tovetumaganavo 'ifwaidi 'wa na venua'ivinedi i na vetoveimea bega tove'ikwayekwayeganidi i na vonayavuga matadie. We'e tovetumaganavonidi i na vetoveimeaga, 'ai'edi matamie kebu 'adi wagava bwaikidiga, kebu tamu ava'ai, 'adi fata i na veimea tonovina. ⁵ De'e bani'odi a voneyediga bega 'wa na bunumayaga. 'Wa vovonayavuga Yaubada 'ana tobavu matadie 'ana 'isa 'wa da vo kebu tamu aitoi 'waimiega ma yana 'asetaga, kumanina 'ana fata emiavo yadi ve'ikwayekwayega i na kiavetonovi. ⁶ I lubwainemi tauni'avami 'wa da kikiavetonova siwe tovetumaganavo 'ifwaidi ediavo i nunawedi 'eba vonayavuga 'waineye, bei Yaubada 'ana tobavu matadie i vovonayavuga i vevitadiga faifaina.

⁷ ⁵Omi tovetumagana yami ve'ikwayekwayega wata emiavo 'wa nunawedi 'eba vonayavuga 'waineye, 'eba 'isa Yaubada yana nuanua kebu 'wa da 'i'idewadi, sakona i vetoketoke 'waimie. We'e 'ai'edi emiavo i na vesauluva

❖ 6:7: Mad 5:39-40; 1 Tes 5:15

sakoina 'waimie 'alo yami kukua i na vinagodiga tamu 'eda'eda 'atumaina i 'eno'eno, 'wa na tokemaigemi kebu naninina faifaina 'wa na nuanua. ⁸ Siwe tokemaiga 'wa baila, ma emiavo 'wa vevesauluva sakoina wata 'wa vavainago. Fai emiavo tovetumagana ma fuemie, mogitana 'waidie 'wa da vesauluva 'atumaina, siwe 'wa vevesauluva sakoina 'waidie.

⁹⁻¹⁰ [✡]'Wa da vo kebu 'wa da 'asetai, tosakona kebu 'adi veuveuta i na veluagaiga abame Yaubada yana 'Eba Veimea nageneye. Kebu nuanuaku tamu aitoi i na vekaliemiga, tosakonanidi kebu i na lukuga side sauluvanidi 'waidiega. Tomotoganidi bunu 'ana nuanua sakoidi i 'i'idewadiga, tomotoganidi ma yadi subia i 'odu'odu yaubada-vekavekali 'waidie, tomotoganidi vevine i luluobuyediga, tomotoganidi iaveta'ava i sakosakonaga, tomotoganidi i vavainagoga, tomotoganidi i luluve'ove'o'olagiga, tomotoganidi ufa toketokena i toke i yemuyemu, tomotoganidi i vevebonaivoga, wata tomotoganidi i lalaugiva kukua faifaidi, taunidi kebu i na luku. Tomotoganidi de'e bani'odi, kebu tamu sai'afu 'adi veuveuta i na veluagai Yaubada yana 'Eba Veimea nageneye. ¹¹ [✡]'Ifwaimi basenadi kebu 'wa da vetumagana Keliso 'waineye bani'odi 'wa vevesauluvedi, tutuya de'e 'akonadi yami sakona i lekoa-yavuledi. 'Ada Toveimea Iesu Keliso 'ana wagavayega wata yada Yaubada 'Anu'anununa yana toketokena 'wainega Yaubada i 'ive'atumaimi bega 'omi yana tomotoga

[✡] **6:9-10:** Efe 5:5; Ve 22:15 [✡] **6:11:** Tai 3:3-7

magemagetami, kebu tamu yami sakona mataneye.

Tomogoda 'Anu'anunu 'Atumaina yana 'eba mia,

kebu ta na lu'avo'avovoyedi.

¹² Voke 'ifwaimi 'wa vo, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." Siwe a na vo, Sauluva matatabuna kebu 'atumai'avadi, wata kebu 'eba 'aivaita." Wata voke 'ifwaimi 'wa na vo, Kebu, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." We'e yau a na vo, Sauluva 'ifwaidi a baila, i na nunago sauluvanidi i na vetoketoke 'waikuye 'wa da vo i da veveimeyeku." ¹³ [✡]Wata 'ifwaimi 'wa vo, 'Ani'ani kamo faifaina, we'e kamoda 'ani'ani 'ana mwai bega 'ai'edi tomogoda 'waidiega ta na sakosakonaga, kebu tamu ava'ai." Siwe 'awaie Yaubada yana veimea 'wainega 'ani'ani wata kamo 'adi 'ailuga i na 'a'ava. Tomogoda kebu sakona faifaina, i lubwaineda tomogoda ta na folovedi 'Auvea faifaina, we'e taunina tomogoda 'adi to'isave'avina. ¹⁴ [✡]Yaubada yana toketokena 'wainega 'ada Toveimea Iesu i sivetovoia wafayega, wata bani'odi yana toketokenanina 'wainega i na sivetovoida tomogoda i na ve'ivau.

¹⁵ [✡]'Wa da vo kebu 'wa da 'asetai, tomogomi Keliso du'una. Tomogoku, Keliso du'una, 'wa da

[✡] **6:13:** 1 Tes 4:3-4 [✡] **6:14:** Lom 8:11; 2 Kol 4:14 [✡] **6:15:** 1 Kol 12:27

nuani 'ana fata 'wainega a na sakona vavine toalagogona taiadi bega tomogoma i na luvetubama? A nuani kebu tamu sai'afو i da lubwaineni. **16** [◇]Wata 'wa da vo kebu 'wa da 'asetai, 'ai'edi aitoi i na sakona tamu vavine taiadi 'akonadi i luvetubama tomogodi 'aitamogana. I na luvetubamaga fai tamu vona i 'eno'eno Yaubada yana Buki nageneye i vo,

'Adi 'ailuga siwe 'wa da vo tomotoga 'aitamogana."

17 We'e 'ai'edi aitoi taunina i na tauyeni 'ada Toveimea Keliso 'waineye taiadi i na miave'itubamaga, tomogonina 'anu'anununa wata Keliso 'Anu'anununa 'akonadi taiadi i luvetubama nika 'aitamogana.

18 Bunu 'ana nuanua sakoidi matatabuna 'wa na kekesedi. Sauluva 'ifwaidi sakoidi kebu i na tunuvedamana tomogomie, we'e 'ai'edi bunu 'ana nuanua 'waidiega 'wa na sakonaga, sakonanina i na 'eno'eno tomogomie. **19-20** [◇]'Wa da vo kebu 'wa da 'asetai, tomogomi 'Anu'anunu 'Atumaina yana 'eba mia, 'Anu'anununina Yaubada yana 'anivelena, nagemie i miamia. Tomogomi kebu taunimi yami 'eba veimea, Yaubada 'aiseotogina 'ami Toveimea fai tutula bwaikaotogina 'wainega i kimwanemi, tutulanina Keliso, i 'aniveleneni i wafa faifaimi. Fai Yaubada i kimwanemi, kebu tomogomi 'wa na tauyedi sakona 'waineye, we'e mogitana tomogomi 'waidiega 'wa na vevesauluva 'atumaina Yaubada 'ana subia faifaina.

[◇] **6:16:** Nag 2:24 [◇] **6:19-20:** 1 Kol 3:16; 1 Fit 1:18-19

7

Faulo i veifufu nagi mogitana faifaina.

¹ Basenadi leta 'wa kilumi i mai 'wa velutoli nani 'ifwaidi faifaidi, bega tutuya de'e naninidi a na veifufuyedi.

'Ai'edi aitoi kebu nuanuana nagi, 'atumaina, kebu tamu ava'ai. ² Siwe fai tomotoga fuedi i sakosakona bunu 'ana nuanua 'waidiega i na nunago sauluvanidi i na silubumi 'wa na sakona, begaidi i lubwaineneni iaveta 'aitamogana 'aitamogana i na nagi bega taunina taunina yana vavine. Wata bani'odi vevine i na nagi bega taunidi taunidi yadi lamoga. ³ 'Ai'edi vavine nuanuadi i na nago yadi lamoga 'waineye, yadi lamoga kebu i na baila, wata 'ai'edi tomogo nuanuana i na nago yana vavine 'waidie, yana vavine kebu i na baila. ⁴ Kebu i na bailaga fai vavine i nagiga tomogodi kebu 'aisedi 'ana toveimea, wata yadi lamoga yana 'eba veimea. Wata bani'odi tomogo i nagiga tomogona kebu 'aisena 'ana toveimea, wata yana vavine yadi 'eba veimea. ⁵ 'Eno faifaina, iaveta kebu yami vevinevo 'wa na talabodedi, wata vevine kebu yami lalamogavo 'wa na talabodedi. Siwe 'ai'edi tamu tutuya tamu tomogo ma yana vavine i na veifufu yadi nuanua 'aitamogana i na vo, 'Aiata 'ifwaidi nagedie kebu taiadi ta na veluaga bega 'ada fata ta na tauyeda velu'ui faifaina," sauluvanina, sauluva 'atumaina. Mulieta yami velu'ui 'adi 'aiata i na 'a'avana, 'ami fata wata 'wa na veluaga, i na nunago Seitani yana sailubu 'wainega naninina 'ana nuanua i na vebwaika

'waimie nika 'wa na sakona tamu tomogo 'alo tamu vavine taiadi.

6 Yaku vonanidi nagi faifaina, kebu veimea fa'alina a da veleveleemi, siwe a tauyemi bani'odi 'wa na vevesauluvedi. **7** Yau umaumalaku, nu-anuaku iaveta wata vevine matatabumi 'wa da salaku. Siwe Yaubada ma yana nuakalikali 'ada veuveuta tulina tulina i veleda bega 'ifwaidi yana 'aivaitanina 'wainega i 'iveumaladi i folofolova faifaina. 'Ifwaidi yana 'aivaitanina 'wainega i nagi wata faifaina i folofolova.

8 Tutuya de'e a na veifufu umaumala, kolokoloa wata 'wabu'wabula 'waimie. 'Ai'edi tutuya de'e kebu 'wa na nagiga, 'aise'avami 'wa na miamia yau bani'odi, a nuani 'atumaiotogina. **9** [◊]We'e 'ai'edi nuafoumi yalayaladi nuanuami bwaikina ve'avula, i lubwainemi 'wa na nagi. Ve'avula 'ana nuanua i na vebwaikaga 'waimie 'wa da vo i da 'alavekasikasisimi i na nagoga nika 'wa na sakona, we'e 'wa na nagiga 'atumaina, bei kebu 'wa na sakonaga.

10-11 We'e naginagimi a na vonemi. Tamu veimea a na velemi, veimeanina yau kebu 'waikuyega, 'Auvea 'wainega. Vavine naginagidi kebu yadi lamoga i na baileniga, we'e 'ai'edi i na 'iaweni i na nagoga, vetuma kebu i na nagiga tamu tomogo taiadi. 'Ai'edi mia'aise 'ana vebae sakoina 'waidie, i lubwainedi i na viladi yadi lamoga 'waineye, siwe i na veiana taiadi i na mia. Wata bani'odi tomogo yana vavine kebu i na vesa'ilidi.

[◊] **7:9:** 1 Tim 5:14

12 'Ai'edi aitoi i vetumaganaga Keliso 'waineye siwe yana vavine 'alo yadi lamoga kebu i da vetumaganaga, 'adi vona de'e. Vonanina yau tauniku 'waikuyega, kebu 'Auvea i da veleku. 'Ai'edi tamu tomogo taunina tovetumaganaga, we'e yana vavine kebu i da vetumaganaga, siwe nuanuadi taiadi i na miamia, tomogonina kebu i na vesa'ilidi.

13 Wata bani'odi vavine, 'ai'edi vavine tovetumaganaga, we'e yadi lamoga kebu i da vetumaganaga siwe nuanuana yana vavine taiadi i na miamia, vavine kebu i na sa'ilaga. **14** Kebu i na sa'ila taiadi i na miamia fai vavine i vetumaganaga 'waidiega yadi lamoga i ve'atumai Yaubada mataneye bega tomogonina Yaubada yana tomotoga. We'e tomogo i vetumaganaga 'wainega yana vavine i ve'atumai Yaubada mataneye bega vavinendi Yaubada yana tomotoga. 'Ai'edi tama wata ina kebu i na ve'atumai Yaubada mataneye, natudiavo 'wa da vo Yaubada 'ana tobavu natudiavo, we'e mogitana fai 'adi 'ailuga i ve'atumaiga, natudiavo wata i ve'atumai bega matatabudi Yaubada yana tomotoga.

15 ☩'Ai'edi tamu tomogo tovetumaganaga we'e yana vavine kebu i da vetumaganaga nuanuadi yadi lamoganina i na baileni i na nago, tomogo kebu i na talabodediga i na tauyedi. Wata bani'odi 'ai'edi tamu vavine tovetumaganaga we'e yadi lamoga kebu i da vetumaganaga nuanuana yana vavinendi i na bailedi i na 'awa'idia, vavine kebu i na talabodeniga i na tauyen. Kebu tamu veimea i da 'eno'eno bega tovetumaganaga i na yagonidi, 'ai'edi yana vavine 'alo yadi lam-

oga kebu i da vetumaganaga nuanuadi i na nagoga, 'asa'aiana i na tauyenimo. I na nagoga fai Yaubada i venua'ivineda kebu nuanuana ve'ikwayekwayega, nuanuana yada mia 'atumai'avana. ¹⁶ ☩'Omi vavine 'wa vetumaganaga a na vonemi. 'Omi kebu 'wa da 'asetai siwe 'ai'edi yami lamoga taiadi 'wa na miamia, voke yana nuanua 'wa na sivilai nika i na vetumaganaga Keliso 'waineye. Wata 'omu tomogo 'u vetumaganaga bani'odi, kebu 'u da 'asetai siwe 'ai'edi yamu vavine taiadi 'wa na miamia, voke yadi nuanua 'u na sivilai nika i na vetumaganaga.

'Omi Keliso yana tomotoga yavuyavumi.

¹⁷ ☩'Omi tovetumaganavo wata a na vonemi. 'Aitamogana 'aitamogana yada mia wata yada sauluva tulidi bani'odi 'Auvea i veutada, bega kebu tamu aitoi i na vo, Yaku mianina i na veltuli." Yaubada yana vegole 'wainega 'wa luku yana 'Aila'a 'waineye, siwe kebu 'wa na vo, Yaku mia nagami a na baileni," ava'ai yami folova nagami, tutuya de'e wata 'waineye 'wa na folofolova, 'ai'edi nagami 'omi tomotoga bwaikimi 'alo siaimi 'asa'aiana bei 'wa na miamia. De'e veimeanina a veve tovetumaganavo 'adi 'aila'a 'aitamogana 'aitamogana 'waidie. ¹⁸ Tamu 'eba 'isa side bani'odi. 'Ai'edi tamu tomogo Diu basenadi Yaubada yana tugusa bunu 'aibobo i 'ewai, mulieta Yaubada yana vegole 'wainega i luku Keliso yana 'Aila'a 'waineye, kebu yana nuanua i na vo, Tugusanina a na luvuyovuyoi." Wata 'ai'edi aitoi bunu 'aibobo kebu i da 'ewaiga siwe Yaubada

✩ 7:16: 1 Fit 3:1-2 ✩ 7:17: 1 Kol 7:24

yana vegole 'wainega i luku Keliso yana 'Aila'a 'waineye, kebu i na vo, Bunu 'aibobo a na 'ewai." ¹⁹ [✡]'Ai'edi bunu 'aibobo ta 'ewai 'alo kebu, kebu tamu ava'ai, we'e nani bwaikina Yaubada yana veimea ta na vevematayakeyakedi. ²⁰ Yaubada yana vegole 'wainega 'wa luku Keliso yana 'Aila'a 'waineye, siwe kebu 'wa na vo, Yaku mia nagami a na baileni," 'aitamogana 'aitamogana yami mia nagami, 'asa'aiana 'waidie 'wa na miamia. ²¹ Wata tamu 'eba 'isa, 'ai'edi 'ifwaimi 'wa vetofolova-maimaiga tamu toveimea 'waineye, siwe Yaubada yana vegole 'wainega 'wa luku Keliso yana 'Aila'a 'waineye, 'ami toveimeavo yadi veimea fa'alidi faifaidi kebu 'wa na nuanua, 'wa na folofolovamo. Siwe 'ai'edi yami toveimea i na tauyemi i na vo, 'Asa'aiana 'wa nago," 'ami fata 'wa na 'iaweni. ²² 'Wa vetofolova-maimaiga kebu faifaina 'wa na nuavita fai tutuyanina 'ada Toveimea Keliso i golemi 'wa luku yana 'Aila'a 'waineye, nika bei i yavumi. Mogitana tutuya de'e tamu tomogo i veveimeyemi, siwe 'omi Keliso yana tomotoga yavuyavumi, sakona kebu i da veveimeyemi. We'e 'ifwaimi kebu tamu tomogo 'waineye 'wa da vetofolova-maimaiga, tutuyanina Keliso yana vegole 'wainega 'wa luku yana 'Aila'a 'waineye, bei 'wa vetofolova-maimaiga faifaina. ²³ Yaubada i kimwanemi tutula bwaikaotogina 'wainega, tutulanina Keliso, i 'aniveleneni i wafa faifaimi, begaidi taunina 'ami Toveimea mogitana. Kebu yami nuanua 'wa na tauyedi bega tamu aitoi i na veveimeyemi. ²⁴ Ekwavo, Yaubada yana vegole 'wainega yami sauluva 'wa siviladi 'wa luku

Keliso yana 'Aila'a 'waineye siwe kebu 'wa na vo, Yaku mia nagami a na baileni," 'aitamogana 'aitamogana yami mia nagami, 'asa'aiana 'waidie 'wa na miamia. Siwe tutuya de'e Yaubada i milafinimi wata i 'i'ivaisemi.

Umaumala, kolokoloa, wata 'wabu'wabulavo 'adi vona.

²⁵ Tutuya de'e yami velutoli egavo kebu i da nagiga faifaina a na tutuli. Kebu tamu veimea 'Auvea i da veleku siwe fai ma yana nuakalikali i venua'ivineku a vetofolova faifaina, bega yaku nuanua a na lu'ivona 'waimie, 'ami fata 'waineye 'wa na vetumagana. ²⁶ Fai vita fuedi i sousouyedi 'ida tovetumaganavo 'waideye, yami mia nagami, a nuani i lubwainemi 'asa'aiana 'waidie 'wa na miamia. ²⁷ Side bani'odi. 'Ai'edi naganagimi, kebu yami vevinevo 'wa na vesalidi. Egavo kebu 'wa da nagiga, kebu nagi faifaina 'wa na nuanua. ²⁸ We'e 'ai'edi 'wa na nagiga 'alo ne'e'elina i na nagiga kebu i na sakonaga. 'Wa na nagiga vita fuedi i na souyedi 'waimie we'e 'ai'edi nagi 'wa na baileni, 'atumaina, kebu nuanuaku 'ami vita i na vefue.

²⁹ Ekwavo, yaku vona 'ana 'aseta side bani'odi. Yada tutuya fwayefwayeye 'akonadi i veve'ale'usa, begaidi tutuya de'e i na nagoga iaveta naganagidi Yaubada 'ana nua'ewa 'waidie i na 'eno'eno, yadi folova toketokena faifaina 'wa da vo umaumaladi. ³⁰ Wata tovemogai, i lubwainedi Yaubada 'ana nua'ewa 'waidie i na 'eno'eno, yadi folova toketokena faifaina 'wa da vo kebu i da nuavitaga. Egavo i sososoana, i lubwainedi Yaubada 'ana nua'ewa 'waidie i

na 'eno'eno, yadi folova toketokena faifaina 'wa da vo kebu i da sosoanaga. Egavo kukua i kimwakimwane, i lubwainedi i na toke i na folofolova Yaubada faifaina siwe 'adi 'isa 'wa da vo kukanidi kebu 'waidie. ³¹⊕Egavo i folofolova fwayafwaya 'ana nani faifaidi, naninidi kebu nuadi i na 'ewadi, i lubwainedi Yaubada 'ana nua'ewa i na 'eno'eno 'waidie. I lubwaineniga fai de'e fwayafwayanina nani 'ifwaidi taiadi tutuya de'e i 'eno'enoviga, sai'afoga i na 'a'ava.

³² Kebu nuanuaku 'wa na venuafouvigia nani fuedi faifaidi. Egavo kebu i da nagiga tutuya matatabuna 'Auvea yana folova faifaina i nuanua fai nuanuadi i na kiavesosoani. ³³ We'e naginagidi, fwayafwaya 'ana nani 'adi nuanua 'waidie i 'eno'eno fai nuanuadi yadi vevinevo i na kiavesosoanidi. ³⁴ 'Auvea yana folova faifaina i nuanua wata yana vavine 'adi kiavesosoana faifaina i nuanua bega yana nuanua i vesidakadakai. Wata bani'odi vevine kebu i da nagiga wata ne'e'ela, tutuya matatabuna 'Auvea yana folova faifaina i nuanua fai nuanuadi tomogodi wata 'anu'anunudi matatabuna i na tauyedi 'waineye. We'e vevine naginagidi, fwayafwaya 'ana nani 'adi nuanua 'waidie i 'eno'eno fai nuanuadi yadi lalamogavo i na kiavesosoanidi.

³⁵ De'e bani'odi a voneyediga nagi faifaina, kebu a da tatalabodemiga, we'e mogitana nuanuaku a na 'ivaisemi bega sauluva 'ana tonovineamo 'wa na nunago. Wata nuanuaku taunimi 'wa na tauyemi mogitana 'Auvea 'waineye, 'aiseotogina 'ana nua'ewa 'waimie i na 'eno'eno.

⊕ 7:31: 1 Ion 2:17

36 'Ai'edi aitoi natuna ne'e'elina i na talabodeni nagi faifaina, mulieta yana nuanua i na sivilai i na vo, Yaku talaboda a nuani kebu 'atumainaga fai natuku 'akonadi nagi 'ana malamala i veluagai wata nuanuana i na nagi." 'Ai'edi bani'odi i na nuanuayediga, taunina 'aisena i na veimea, natuna i na tauyeniga kebu i da sakonaga. **37** We'e 'ai'edi aitoi nuanuana natuna ne'e'elina kebu i na nagiga, kebu venuanaluga 'alo lukakada 'wainega, 'atumaina, taunina 'aisena i na veimea. **38** Yaku vonanina 'ana 'aseta side bani'odi. 'Ai'edi aitoi natuna ne'e'elina i na tauyeni i na nagi, yana nuanuananina 'atumaina, we'e 'ai'edi aitoi natuna ne'e'elina i na talabodeni kebu i na nagiga, yana nuanuananina 'atumaiotogina.

39 **☆**'Ai'edi vavine yadi lamoga ma yawaina i na miamia, vavinenedi yadi lamoga 'ana 'au, 'wa da vo yogoyogonidi yadi lamoganina 'waineye. Mulietu yadi lamoga i na wafaga, 'akonadi yavuyavudi 'wainega, 'ai'edi nuanuadi tamu tomogo taiadi i na nagiga, 'ana fata. Siwe tomogonina taiadi i na nagiga, i lubwaineni taunina tovetumagana. **40** 'Ai'edi i na nagiga 'eba sosoana 'waidie, we'e 'ai'edi kebu i na nagiga, 'eba sosoana bwaikaotogina 'waidie. Fai Yaubada 'Anu'anununa i ageku 'waikuye i miamia, bega yana aware'eda'eda 'wainega a nuani yana nuanua a lulu'ivona 'waimie.

8

Faulo i veifufu 'aisaya i velomuyediga

yaubada-vekavekali 'waidie faifaina.

¹ Ekwavo, yami velutoli 'aisaya i velomuyediga yaubada-vekavekali 'waidie a na tutuli. Sauluvanina faifaina 'wa vo, Matatabuda ma yada 'aset'a." 'Wa vonaga 'wa vona mogitana, siwe 'ai'edi aitoi ma yana 'aset'a, nuanuana ma yana nualaka taunina i na awa'ai'aia. We'e 'ai'edi aitoi ma yana nuakalikali, nuanuana enavo i na kavetoketokedi. ² Wata 'ai'edi aitoi yana nuanua i na vo, Yau to'aseta, nani matatabuna a 'asetadi," 'ana 'isa tomogorina bavubavuna, naninidi i lubwaineni i da 'asetadi siwe i bavuyedi. ³ ⁴We'e mogitana aitoi Yaubada i nuakalikalieniga tomogorina faifaina Yaubada i vo, Taunina yaku tomotoga, a 'asetai."

⁴ 'Aisayanidi faifaidi side bani'odi. Tomotoga 'ifwaidi 'aisaya i nikenikedi i 'a'anivelenedi yaubada-vekavekali 'adi subia faifaina, mulieta 'aisayanidi 'ifwaidi i nunawedi 'eba sivedavedamana 'waineye vekimwane faifaina. 'Aisayanidi faifaidi 'wa velutolieku 'wa vo, 'Ida tovetumaganavo, 'ada fata 'aisayanidi ta na kimwanedi ta na 'anidi 'alo kebu?" Ta 'asetai Yaubada 'aitamogaotogina i miamia, wata kebu tamu ava'ai 'alo aitoi taunina bani'odi. We'e yaubada-vekavekalinidi ta 'asetadi fwayefwayeye taunidi nani-'avo'avovo. ⁵⁻⁶ ⁵Siwe tomotoga 'ifwaidi 'waidie i vevelomu yadi nuanua i vo, Fwayefwayeye wata abame yaubadavo fuerdi i miamiani." Mogitana yaubadavo fuerdi, toveimea fuerdi wata yaiaina i miamiani, siwe 'ida 'waideye, Yaubada 'aitamogaotogina,

⁴ **8:3:** Ion 14:23 ⁵ **8:5-6:** Efe 4:6; Ion 1:3

taunina Tamada. Tamadanina nani matatabuna tomotoga taiadi 'ada to'idewadewa, we'e 'ida yana nuanua 'ana to'idewadewa. Wata bani'odi 'ada Toveimea Bwaikaotogina 'aitamogaotogina i miamia, Toveimeanina Iesu Keliso. Yaubada yana veimea 'wainega Keliso nani matatabuna i 'idewadi, wata 'wainega yada mia 'ivauna wata 'atumaina ta veveluagai.

⁷ Yaubada 'aitamogaotogina i miamia we'e yaubada-vekavekali nani-'avo'avovo, siwe tovetumagana matatabudi kebu i da 'asetai. Malamala fuedi nagedie, 'ifwaidi yadi nuanua igodina yaubada-vekavekali yaubadavo mogitana. Avinodi tutuya de'e i vetumagana Keliso 'waineye, siwe yadi nuanuananina kebu i da baileni, begaidi 'ai'edi 'aisaya mali tomotoga i velomuyediga yaubada-vekavekalinidi 'waidie i na 'ania, yadi nuanua igodina yaubadanidi yadi toketokena i da 'eno'eno 'aisayanidi 'waidie. Tomotoganidi yadi vetumagana bola kebu i da vetoketoke 'ai'edi i na 'ani'aniga, 'adi vebae 'waidie i na lutonovi i sakosakona. ⁸ Ava'ai 'aisayaga 'alo 'ani'aniga ta na 'anidiga faifaina Yaubada kebu i da nuanua. 'Aisaya i velomuyediga ta na 'anidiga, kebu ta na vaganago Yaubada 'waineye, we'e ta na bailaga, wata kebu ta na vaganago 'wainega.

⁹ ⋆'Akonadi 'wa 'asetai kebu tamu aitoi i da talabodemi, 'aisayanidi i velomuyediga yaubada-vekavekali 'waidie 'ami fata 'wa na 'ani, siwe yami sauluvanina 'wa na 'i'isave'avini i na nunago mali tovetumagana yadi vetumagana mweadi 'wa na kiavebe'udi i na sakona.

10 Tovetumagananidi yadi nuanua i vo, 'Ai'edi 'aisayanidi i velomuyediga yaubada-vekavekali 'waidie 'a na 'anidiga, 'a na sakona Yaubada mataneye." We'e 'omi 'akonadi 'wa 'asetai kebu tamu aitoi i da talabodemi, we'e 'ai'edi 'aisayanidi 'wa na 'ani'ani yaubada-vekavekali yadi vanuga 'eba 'odu'odu nageneye, voke tamu iami yana vetumagana mweana i na 'isemi i na vo, 'Aku vebae 'waineye a lutonovi 'ai'edi bani'odi a na vesauluvediga a na sakona, siwe fai mali tovetumaganavo i 'ani'ani yaku talaboda a na geuya, yau wata a na 'ani." Tomogonina taunina yana talaboda i na geuyaga nika i na sakona Yaubada mataneye. **11** Mogitana tomogonina yana vetumagana mweana, siwe taunina iami, Keliso i wafa faifaina, siwe fai 'omi tovetumagana 'wa vo, 'A 'asetai kebu tamu nani sakoina," tomogonina taunina yana talaboda i geuya nika 'akonadi 'wa kiavebe'uya, wafaotoga 'ana 'edeamo i nunago. **12** 'Ai'edi yami sauluvanina emiavo tovetumagana i na 'isemi i na sakonaga, 'wainega yadi vetumagana wata 'adi vebae 'wa na 'ivesakodi, 'omi 'akonadi 'wa sakona Keliso 'waineye fai tomotoganidi yana tomotoga. **13** [✡]Fai kebu nuanuaku iaku i na sakona, tauniku a na bodaku. 'Ai'edi yaku 'ani 'wainega i na vetutuyameku i na sakonaga, tauniku a na bodaku, kebu tamu tutuya 'aisaya a na 'alatonovi i na nunago iaku a na kiavebe'uya sakona 'waineye.

Faulo i vetomata'aulelega ma yana veimea,

siwe taunina faifaina kebu i da nuanua.

¹ ✝Yau Iesu Keliso yana tomata'aulele, kebu tamu ve'etoboda 'alo tomotoga i da veveimeyeku. 'Ada Toveimea Iesu mogitana a 'isaotogi, a vетofolova faifaina bega yaku lau'age 'waidiega 'wa vetumagana 'waineye, 'omi yaku folova vuagina.

² ✝Tomotoga 'ifwaidi yadi nuanua igodina yau kebu Keliso yana tomata'aulele, we'e 'omi, a nuanu mogitana 'wa vo, Yana tomata'aulele." 'Wa 'asetakuga fai yaku folova 'wainega ma yami vetumagana 'wa miave'itubama 'ada Toveimea Keliso taiadi, 'eba 'isa yau yana tomata'aulele mogitana.

³ 'Ai'edi egavo ma yadi 'amalakibu nuanuadi i na 'asetaku, 'waidie side bani'odi a voneyedi.

⁴ Banabasa wata yau, 'ama 'ailuga Yaubada yana tofolovavo, begaidi ma yama veimea i lubwaineni 'ama'ama wata 'ama ufa 'a da veveluagadi tovetumagana 'waimiega. ⁵ Tomata'aulele 'ifwaidi, wata 'ada Toveimea Iesu tainavo yadi vevinevo taunidi tovetumagana, bega taiadi i yabayaba yadi lauvivila 'waidie, wata bani'odi Fita ma yana vavine. 'Wa da nuani, voke 'aise'avama kebu 'ama fata 'a na saladi? Kebu, ma yama veimea.

⁶ Tomata'aulele 'ifwaidi 'adi 'aivaita i veveluagadi tovetumaganavo 'waidiega, we'e 'wa da nuani, yau wata Banabasa 'ama 'aivaita faifaina taunima nimamega? Kebu, wata ma yama veimea, 'ana fata 'ima wata tomata'aulelenidi taiadi 'aivaita 'a da veveluagadi tovetumagana 'waimiega.

✝ 9:1: Fol 26:16 ✝ 9:2: 2 Kol 3:2-3

*Yaubada yana tofolovavo i lubwainedi 'adi
'aivaita i na*

veveluagadi tovetumaganavo 'waidiega.

⁷ Tolugaviavo 'adi'adi wata 'adi kaleko kebu taunidi yadi mani 'waidiega i da kimwakimwane, nonogidi gabemani i veleveledi. Tobakula kebu tamu aitoi i na talaboden'i 'ani'aninidi yana baku-layega i na bailedi. Ma yana veimea 'ana fata i na 'ani. Toyaubani wata ma yana veimea, 'aisayanidi i na veluagadiga 'ana fata i na 'ani.

⁸ Yaku vonanina kebu tomotoga 'aiseda yada nuanuayega ta da vonavona, wata bani'odi i voneyedi Yaubada yana Buki nageneye.

⁹ [✡]Vonanina Mosese i kilumi i vo,

'Ai'edi yamu 'aisaya i na 'i'ivaisemuga yamu folova 'waineye, kebu 'ani'ani 'u na bodaiga, 'u na tauyeni i na 'ani."

We'e 'omi 'wa da nuani? Yaubada 'aisaya 'aisedi faifaidi i nuanua bega i vona? ¹⁰ Kebu, vona de'e i 'inanai wata 'ima yana tofolovavo faifaima, bega 'ama 'aivaita 'a da veveluagadi tovetuma-gana 'waimiega. Tokoyova wata to'atu'ai i na folofolova i na nuani 'awaie yadi folovanina 'wainege 'ani'ani 'ifwaidi i na veluagadi. ¹¹ [✡]'Ima Yaubada yana tofolova wata bani'odi. Yaubada yana Vona 'a koyovid'i 'anu'anunumi 'waidie, begaidi i lub-waineni 'ama 'aivaita 'a da veveluagadi 'omi 'waimiega. ¹² Yami tovevo 'adi 'aivaita i veveluagadi 'waimiega, 'atumaina, ma yadi veimea bega i lubwainemi 'wa na 'i'ivaised. We'e 'ima, 'a kumeta nagami 'a lau'age 'waimie nika bei 'wa

[✡] **9:9:** VeL 25:4; 1 Tim 5:18 [✡] **9:11:** Lom 15:27

vetumagana Keliso 'waineye, bega mogitana ma yama veimea, i lubwaineni 'ama 'aivaita bwaikina 'a da veveluagadi 'waimiega.

Ma yama veimea, siwe kebu tamu tutuya 'ama 'aivaita faifaina 'a da talavelu'ui 'waimie, we'e mogitana vita fuedi lase taiadi 'waidie 'a totokemaigema bega tomotoga Keliso Valana kebu i na baileni. Kebu nuanuama tamu aitoi i na vo, Faulo ma enavo i lalau'age-sebaseba nuanuadi 'ani'ani wata kukua, bega yadi lau'agenina Keliso faifaina ta baila.” ¹³ ✽ Wa da vo kebu 'wa da 'asetai, tomotoganidi i folofolova vanuga 'eba velu'ui nageneye 'adi'adi i veveluagadi tosubia yadi 'anivelena-maimaiga 'waidiega. We'e tomotoganidi velomu i 'idewaiga 'eba velomu 'ana 'aisayayega 'adi 'aisaya i veveluagadi. ¹⁴ ✽ Wata bani'odi 'ada Toveimea Iesu i veimea Valana 'Atumaina 'ana tolau'age 'adi 'aivaita nani 'ifwaidi taiadi i na veveluagadi Valanina 'ana tovetumaganavo 'waidiega.

Faulo ilau'agemo, tutula kebu, siwe issososoana.

¹⁵ Mogitana ma yaku veimea, i lubwaineni 'aku 'aivaita a da veveluagadi 'waimiega siwe kebu nuanuaku, we'e a kilukiluma de'e, kebu a da vo, A na vekukuyedi bega i na 'ivaiseku.” 'Aku fata tauniku a na awa'ai'aiku a na vo, Iesu Valana 'Atumaina a lalau'agemo, we'e 'aivaita 'waimiega kebu faifaina a da nuanua.” 'Aku 'aivaita faifaina, 'ai'edi 'omi 'alo mali tomotoga a na lulukakademiga, yaku awa'ai'ainina i na venani-'avo'avovo. 'Ai'edi laseyega a na wafaga,

✽ 9:13: VeL 18:1-3 ✽ 9:14: Mad 10:10; Gal 6:6

kebu tamu ava'ai, nuanuaku a na lalau'agemo.
¹⁶ A vetolau'agega, kebu tauniku yaku nuanuayega, we'e mogitana Yaubada i veimeyeku a vetofolova Iesu Valana faifaina. Fai i veimeyeku i lubwaineku a na lalau'age, kebu 'ana fata tauniku a na subiaku folovanina faifaina, we'e 'ai'edi a na vedumwe'ai'ai, nuakalikali i na 'a'aveku, vita bwaikina a na veluagai. ¹⁷ 'Ai'edi tauniku yaku nuanuayega a da folofolova 'ana fata tutula a da veluagai, siwe fai Yaubada i venua'ivineku folovanina i veleku kebu 'aku fata a na baileni.
¹⁸ Vetuma, 'wa da nuani yaku folovanina 'ana tutula ava'ai? 'Aku tutula side. A sosoana fai tutuyanina Iesu Valana 'Atumaina a lalau'age, kebu a da talavelu'ui tutula faifaina, 'ani'ani 'alo mani. Ma yaku veimea bega 'aku fata tutula a da 'ewai, siwe yaku veimeanina 'asa'aiana a lalau'agemo. Yaku sosoananina 'asa'aiana taunina 'aku tutula.

*Faulo nuantuana bwaikina tomotoga
matatabuna*

i na miedi Keliso 'waineye.

¹⁹ Yaku folova 'ana tutula kebu tamu aitoi 'wainega a da veveluagai, begaidi yau yavuyavuku, kebu tomotoga i da veveimeyeku. Siwe tauniku a tauyeku a vetofolova-maimaiga tomotoga matatabuna 'waimie bega fueotogimi a na vagavaimi 'wa na maia Keliso 'waineye.
²⁰ Tutuyanina me Diu taiadi 'a miamiaga yadi sauluvayega a nunago bega ava'ai a na voneyeniga 'adi fata bonaku i na nogai nika i na vetumagana. Fai a miave'itubama Keliso taiadi, ve'etobodanidi i mai Moses 'wainega kebu i da veveimeyeku, siwe tutuyanina

ve'etobodanidi 'adi tove'ililibu taiadi 'a miamia, yau wata a veve'ililibuyedi bega ava'ai a na voneyeniga tomotoganidi 'adi fata bonaku i na nogai nika i na vetumagana. ²¹ Wata bani'odi, tutuyanina mali tomotoga taunidi kebu Diu taiadi 'a miamia, yadi sauluvayega a nunago bega ava'ai a na voneyeniga 'adi fata bonaku i na nogai nika i na vetumagana. Yadi sauluvanidi a vevetutuyamediga siwe kebu Yaubada yana veimea a da geudi, we'e mogitana Keliso i veveimeyeku yana nuanua a 'i'idewadi. ²² Tutuyanina tomotoganidi yadi vetumagana mweadi taiadi 'a miamia, naninidi faifaidi i venuanaluga kebu a da sidibidibiedi 'alo a da 'amalakibuyedi, siwe sauluvanidi a ve'ililibuyedimo bega ava'ai a na voneyeniga 'adi fata bonaku i na nogai nika i na vetumagana. Tomotoga matatabuna yadi sauluva tulina tulina 'waidiamo a nunago, 'eda'eda matatabuna 'waidiega a folofolova 'ai'edi tomotoga 'ifwaidi a na vagavaidi i na maia Keliso 'waineye nika 'ita'ita'i i na veluagai. ²³ De'e bani'odi a vervesauluvediga Iesu Valana i na vebwaika tomotoga 'waidie, nika Valana 'ana tovetumagana ma fueda Yaubada yana nuakalikali ta na veluagadi.

²⁴ ⚭'Wa da vo kebu 'wa da 'asetai, 'wawa 'waineye, tomotoga fuedi i veve'ililide, siwe tokumeta kebu fuediga. Tomotoganidi ma yadi tokemaiga i lilide tutula 'ana 'ewa faifaina, 'omi wata bani'odi 'wa na tokemaigemi bega nani 'atumaina 'wa na veluagai Yaubada 'wainega.

25 [☆]Tolilidenidi nuanuadi i na kumeta begaidi 'ifwaidi veimea i na ve'ililibuyedi bani'odi yadi 'ani, yadi 'eno i na 'i'isave'avinidi nika i na vetoketoke. Veimeanidi i na ve'ililibuyediga bega kumeta 'ana kunabanaba i na 'ewai, kunabanabanina ma 'ana ve'ililibu, 'ana 'isa'isa kini 'adi vaigavu bani'odi, siwe mosomosoyega i 'idewai wata 'a'a'avina. We'e 'ida ta na tokemaigeda Yaubada yana nuanua ta na 'i'idewadi bega 'ada kunabanaba 'eno'eno-vagaidi ta na veluagadi. **26** Begaidi yau kebu a da yogo-balabala tonovina a na nunago Yaubada yana 'eda'eda 'waineamo.

Wata tamu 'wava 'waineye tomotoga 'adi 'ailuga nimadiega i na vetalaga, i na 'ainikedewa kebu i na tufaweli. Yau wata bani'odi a folofolova-dewa Yaubada yana folova 'waineye. **27** Tomogoku a toke a veveimeyeni, kebu a da tauyeni nani-'avo'avovo 'waidie, i na nunago tomotoganidi 'waidie a lau'agega i na kumeta nani 'atumaina i na veluagai Yaubada 'wainega, we'e yau i na ve'idi'ideku.

10

Yada sauluva ta na 'isave'avinidi bega kebu ta na be'u.

1 [☆]Ekwavo, nuanuaku 'wa na nuani tubudavo me Diu yadi sauluva, fai Yaubada yana nuanua i bailedi kebu tamu nani 'atumaina i da veluagai 'wainega. Basenadiotoga Moses tubudavo i vagavaidi Itifita 'wainega i nagoi sali'avu'avuye. Matatabudi Yaubada i 'edakumesedi yana waowa

[☆] **9:25:** Iem 1:12 [☆] **10:1:** Sou 13:21, 14:22-29

'wainega wata yana veimea 'wainega Eyaga Yamoyamoina i 'awa'idia, matatabudi lalaneamo i damana. ² Waowanina i ve'i'wa'uyediga 'wa da vo 'wainega i da bafitaisodi bega taunidi Mosese yana tomotoga mogitana, wata bani'odi tutuyanina eyageamo i damadamana wata 'wa da vo bei i da bafitaisodi. ³ [◊]Sali'avu'avuye 'ani'ani wata ufa kebu, siwe tubudavo matatabudi tamu 'ani'ani 'wainega i 'ani, 'ana wagava mana, Yaubada 'Anu'anununa yana 'anivelena. ⁴ [◊]Wata bani'odi tamu ufa i yemuyemu, Yaubada 'Anu'anununa yana 'anivelena, ufanina i souyeni tamu kileu 'wainega. Kileunina 'asa'aiana taunina Keliso, i 'wea'weabudi wata i 'i'isave'avinidi. ⁵ [◊]Avinodi Yaubada i 'i'isave'avinidi wata i 'e'edakumesedi, siwe yana nuanua kebu i da vematayakeyakedi bega sai'afu matatabudi kebu faifaidi i da sosoana. Fai kebu i da vematayakayakaga, sali'avu'avuye i ve'alawafawafa 'wa da vo bei Yaubada tomogodi i da luyavuyavuledi.

⁶⁻⁷ [◊]Yadi sauluvanidi sakoidi wata 'adi vematavuloga, yada 'eba 'isa bega kebu ta na vetutuyamedi. Sauluvanidi sakoidi Yaubada i talabodediga nuanuadi bwaikina, we'e 'ifwaidi ma yadi subia i 'odu'odu yaubada-vekavekali 'waidie. Yadi sauluvanidi faifaidi tamu vona i 'eno'eno Yaubada yana Buki nageneye i vo,

Tomotoganidi i miabui bega i na 'ani wata i na yemu, Mulieta i tovoi ma yadi vebaisa i suya sakona faifaina.”

[◊] **10:3:** Sou 16:35 [◊] **10:4:** Sou 17:6 [◊] **10:5:** Num 14:26-30;
Ibu 3:17 [◊] **10:6-7:** Sou 32:6

8 ☲ Kebu i da lubwaineda bunu 'ana nuanua 'waidiega ta na sakona tomotoganidi 'ifwaidi bani'odi, yadi sakonanina faifaina Yaubada vematavuloga i veledi, 'aiata 'aitamogana nageneye 23,000 i ve'alawafawafa. **9** ☲ Wata kebu i da lubwaineda Yaubada ta na silubuya tomotoganidi 'ifwaidi bani'odi. Yadi sakona 'waidiega 'Auvea yana tokemaiga i silubuya i vo 'ako, Kebu vematavuloga i na velemaga," siwe yana veimea 'wainega 'o'olo kasikasisidi i ovadi i ve'alawafawafa. **10** ☲ Kebu i da lubwainemi 'wa na ve'anigovoluvolu Yaubada 'waineye tomotoganidi 'ifwaidi bani'odi, Yaubada yana anelose i vetunei i luvwewafadi.

11 ☲ Vematavulogani tomotoga 'ifwaidi yadi 'eba 'isa, ifuifufudi i kilumidi Yaubada yana Buki nageneye bega ta na 'isedi ta na nuanuanidi nika kebu ta na vetutuyamedi. Ifuifufunidi kebu ta na venuafanidi fai 'ida tutuya 'eba ve'a'ava 'waineye ta miamiani.

12 'Ai'edi aitoi yana nuanuayega i na vo, Ma yaku vetumagana a tovotovoi fa'alina," i lubwaineni tomogonina taunina yana sauluva i na 'i'isave'avinidi i na nunago i na be'u sakona 'waineye. **13** ☲ 'Eba sailubu tulina tulina 'wa veveluagadi 'wa na sakonaga faifaina, kebu 'aisemi 'waimie i da sousouyedi, wata tomotoga matatabuna 'waidie. Siwe Yaubada i vona'awaufaufa i na 'ivaiseda 'eba sailubu 'waidie, bega 'ada fata ta na vetumagana 'waineye, 'ai'edi 'eba sailubu 'wa na veluagadi

✡ **10:8:** Num 25:1-2 ✡ **10:9:** Num 21:5-6 ✡ **10:10:** Num 16:41,49 ✡ **10:11:** Lom 15:4 ✡ **10:13:** Ibu 4:15

siwe Yaubada i na 'ivemweadi bega kebu 'ana fata i na vetoketoke 'waimie. Tutuyanina 'eba sailubu 'wa na veluagadi siwe Yaubada tamu 'eda i na 'idewai bega 'ami fata 'wa na dega sakonanidi 'waidiega nika 'wa na tovotovoi fa'alina.

Kebu 'ailuga 'waidie taunida ta na tauyeda, Iesu 'aisena 'waineye.

¹⁴ Ekwavo, kebu nuanuaku 'eba sailubu 'waidiega 'wa na be'u, begaidi yaubada-vekavekali 'wa na mia'iwedi, kebu taiadi 'wa na veiana. ¹⁵ A vonavona 'waimie yaku vonanina to'aseta 'adi vona, 'aitamogana 'aitamogana yaku vona matatabuna 'wa na venua'ivinedi a vona mogitana 'alo a vekekali. ¹⁶ [✠]Tutuyanina ta vava'auta 'ada Toveimea Iesu yana 'ani faifaina, toveuta i vekekaiwa Yaubada 'waineye ufa ma vedina faifaina, mulieta ma yada vekaiwa ta yemuyemu 'wa da vo Keliso dayagina ta da yemuyemuya, yada 'eba 'isa yana wafa 'wainega ta miave'itubama taunina taiadi. Wata 'ani'ani vividi ta 'ani'ani 'wa da vo Keliso tomogona ta da 'ani'ania, yada 'eba 'isa yana wafa 'wainega ta miave'itubama taunina taiadi. ¹⁷ 'Ani'aninina 'aitamogana 'wainega ta 'ani'ani, tomotoga fueda, siwe yada 'aninina 'wainega i luvetubamida, 'ida Keliso yana 'Aila'a 'aitamogana, 'Aila'anida 'asa'aiana Keliso tomogona.

¹⁸ 'Wa na nuani me Isileli yadi sauluva. 'Ani'ani wata 'aisaya i 'a'anivelenedi Yaubada 'waineye 'eba velomu 'wainega, mulieta tovelomu 'ani'ani

[✠] **10:16:** Mad 26:26-28; Lom 12:5

wata 'aisaya 'ifwaidi i veveviladi bega tomotoganidi i 'ani'anidi. Fai 'ani'aninidi 'eba velomu 'wainega i 'ani'anidi, yadi 'eba 'isa taunidi i tauyedi Yaubada 'waineye, bega yana tomotoga mogitana. ¹⁹ \diamond Voke 'wa na vo, Faulo yana vonanina 'ana nogaya yaubada-vekavekali mogitana ma yadi toketokena i miamia wata 'aisayanidi i velomuyediga 'waidie nani bwaikidi ma yadi toketokena." ²⁰ Siwe kebu, yaku vonanina 'ana 'aseta side bani'odi. Tutuyanina Yaubada 'ana tobavu yadi 'aisaya i vevelomuyedi, kebu Yaubada 'waineye, we'e mogitana yaiaina 'waidie bega taunidi yadi tomotoga mogitana. 'Ai'edi tomotoganidi ma yadi subia 'aisaya i na vevelomuyedi wata i na 'ani'anidi yaubada-vekavekali matadie, kebu nuanuaku taiadi 'wa na 'ani. Taiadi 'wa na 'aniga, 'eba 'isa ma fuemie 'wa veiana yaiaina taiadi. ²¹ \diamond Kebu 'wa na yemu-lugaluga Iesu 'ana vediegana wata 'wa na nago yaiaina Seitan enavo 'adi vediega. Wata kebu 'wa na 'ani-lugaluga Iesu yana ta'ulayegana wata yaiaina yadi ta'ulayega. ²² 'Ai'edi nuanuami 'ailuganidi 'waidie 'wa na veianaga, yami sauluvanina 'wainega 'Auvea i na ve'unumagigi fai taunina 'aiseotogina toke-tokeotogina 'omi kebu bani'odiga.

*Yada sauluva matatabuna 'waidiega Yaubada
ta na kialakai.*

²³ Voke 'ifwaimi 'wa vo, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." Siwe a na vo, Sauluva matatabuna kebu

\diamond **10:19:** 1 Kol 8:4 \diamond **10:21:** 2 Kol 6:15-16

'atumai'avadi wata kebu 'eba 'aivaita. Wata voke 'ifwaimi 'wa na vo, Kebu, Iesu yaku sakona i ve'a'avadi begaidi yavuyavuku, 'ai'edi ava'ai sauluvaga nuanuaku, 'aku fata a na 'idewai." We'e yau a na vo, Sauluva 'ifwaidi ta na 'idewadiga, yada vetumagana Keliso 'waineye kebu i na vetoketoke." ²⁴ Kebu i da lubwaineni tamu aitoi taunina yana nuanua 'aisedi faifaidi i na nuanua, wata mali tomotoga 'adi 'aivaita faifaina i na nuanua.

²⁵ We'e 'omi side bani'odi 'wa na vervesauluvedi. Ava'ai 'aisayaga 'wa na 'iseni 'eba sivedavedamana 'waineye, 'ami fata 'wa na kimwane wata 'wa na 'ani. Kebu 'wa na velutolitoli 'wa na vo, 'Aisayanina, ava'aiega i mai, i velomuyed yaubada-vekavekali 'waidie 'alo kebu?" ²⁶ 'Wa na 'anidimo fai tamu vona i 'eno'eno Yaubada yana Buki nageneye i vo,

Fwayafwaya 'Auvea 'ana 'idewadewa, wata naninidi i 'eno'enoviga fwayefwayeye, 'Auvea 'wainega i mai."

Begaidi, 'ani'ani wata 'aisaya matatabuna 'atumaidi, 'wa na 'anidimo.

²⁷ 'Ai'edi tamu aitoi, taunina kebu Keliso 'ana tovetumagana, i na tayegimi 'ani faifaina, wata 'ai'edi nuanuami, 'atumaina, 'wa na nago. Ava'ai 'ani'aniga wata 'aisayaga i na yatodi matamie 'wa na 'anidimo, kebu 'wa na velutolitoli 'wa na vo, Ava'aiega i mai, i velomuyed yaubada-vekavekali 'waidie 'alo kebu?" ²⁸⁻²⁹ We'e 'ai'edi tamu aitoi i na vonemi i na vo, 'Aisayanina de'e, nagami i velomuyeni yaubada-vekavekali 'waidie," 'aisayanina 'wa na baileni kebu 'wa na 'ani. 'Omi yami vetumagana toketokena bega yami nuanua 'wa

vo, 'Aisayanina de'e Yaubada 'ana 'idewadewa, 'aku fata a na 'ani." We'e iami i vonemiga yana vetumagana mweana yana nuanua i vo, 'Aisayanina de'e i velomuyediga yaubada-vekavekali 'waidie, yaiaianidi yadi toketokena 'akonadi i damana 'aisayanina 'waineye, begaidi 'ai'edi aitoi i na 'ania i na sakona Yaubada mataneye." Iami yana nuanuananina faifaina 'wa na baileni kebu 'wa na 'ani.

Voke tamu 'waimiega i na vo, Keliso yana wafa 'wainega, yau yavuyavuku, kebu tamu ve'etoboda i da veveimeyeku, kebu i da lubwaineni tamu aitoi yana nuanua i na veimeyeku bega yaku sauluva 'ifwaidi a na bailedi. ³⁰ 'Ai'edi a na vekaiwa Yaubada 'waineye 'aku'aku wata 'aku 'aisaya faifaidi, kebu i da lubwaineni tamu tomogo i na awavesakoyeku i na vo, Awale 'aisaya tabutabuna 'u 'ani'ania?" We'e yau a na 'aniamo, fai 'akonadi faifaina a vekaiwa."

³¹ We'e mogitana side bani'odi 'wa na vesauluvedi. Nani tulina tulina 'wa na 'i'idewadiga, voke 'ani, yemu, 'alo tamu nani, yami sauluva matatabuna 'wa na 'i'isave'avinidi Yaubada 'ana subia faifaina. ³² 'Wa na 'isave'avinidiga bega kebu tamu aitoi 'wa na kiavebe'uya sakona 'waineye. Voke me Diu, mali tomotoga taunidi kebu Diu, 'alo Yaubada yana 'Aila'a taunidi tovetumagana Keliso 'waineye. ³³ Yau wata bani'odi yaku sauluva matatabuna a 'i'isave'avinidi wata a vewawawawa nuanuaku tomotoga matatabudi a na kiavesosoanidi. Kebu tauniku yaku 'atumaina faifaina a da nuanua, we'e mogitana yaku sauluva a 'i'isave'avinidi

tomotoga fuedi yadi 'atumaina faifaina bega 'ita'ita'i i na veluagai Yaubada 'wainega.

11

¹ Yau Keliso a vevetutuyameni, wata 'omi bani'odi, 'wa na vevetutuyameku yau.

Tafalolo 'ana 'eda'eda mogitana.

² 'Omi me Kolinita, yaku vona 'waimie nani fuedi faifaidi 'wa nuanuanidi wata venidi 'ida tovetumaganavo faifaida a ve 'waimie 'wa vevematayakeyakedi, bega faifaidi a subisubiami. ³ Siwe nuanuaku 'wa na 'asetai 'ida iaveta 'ada Toveimea Keliso, wata bani'odi vevine 'adi toveimea yadi lalamogavo, we'e Keliso 'ana Toveimea Yaubada. ⁴ 'Ai'edi tamu tomogo tafalolo 'waineye i na velu'ui 'alo Yaubada yana Vona i na lu'ivona, siwe 'unu'ununa 'ana baniuma kebu i na ta'iaga yada sauluva bani'odi, 'eba 'isa taunina i tauyen'i mali tomotoga yadi veimea 'waineye, we'e 'ana Toveimea Keliso, kebu i da ve'ililibuyen'i. ⁵ 'Ai'edi tamu vavine tafalolo 'waineye i na velu'ui 'alo Yaubada yana Vona i na lu'ivona, siwe 'unu'unudi kebu ma 'ana baniumaga yada sauluva bani'odi, 'eba 'isa kebu yadi lamoga i da ve'ililibuyen'i wata kebu i da tauyedi 'waineye. 'Unu'unudi 'ana baniuma i baila, 'wa da vo 'unu'unudi 'weli'welina, i da bunumayaga. Yadi sauluvanina vevine toalagogona yadi sauluva bani'odi. ⁶ 'Ai'edi baniuma i na baila, i lubwainedi nava'audi i na 'welia, we'e 'ai'edi i na vo, 'Weli 'eba bunumayaga," i lubwainedi 'unu'unudi i na

baniumai. **7** ✝We'e iaveta, Yaubada i 'idewadi taunina 'anununa bani'odi 'ana subia faifaina, begaidi i lubwainedi tafalolo 'waineye 'unu'unudi kebu i na baniumadi, 'eba 'isa Yaubada 'aisena 'adi Toveimea. We'e vevine i 'idewadi, iaveta 'adi subia faifaina, begaidi 'unu'unudi i na baniumadi tafalolo 'waineye, 'eba 'isa yadi lalamogavo i veve'ililibuyedi. **8** ✝Fai basenadi tomogo i 'idewaiga, kebu vavine lumalumadi 'wainega, we'e mogitana vavine i 'idewadi tomogo lumalumana 'wainega. **9** ✝Wata tomogo i 'idewai, kebu vavine faifaidi, we'e mogitana vavine i 'idewadi tomogo faifaina. **10** Fai Yaubada vavine i 'idewadi tomogo faifaina, wata fai anelose i 'ise'isedi, bega tutuyanina i na tafalolo, i lubwainedi 'unu'unudi i na baniumadi yada sauluva bani'odi, 'eba 'isa taunidi i tauyedi yadi lalamogavo yadi veimea 'waidie.

11 We'e tomogo wata vavine, taiadi i na mi-amia Keliso yana 'Aila'a nageneye, kebu i na lau'idi, tomogo vavine i na 'ivaisedi wata vavine tomogo i na 'ivaiseni. **12** I na ve'ivaivaita fai basenadi Yaubada vavine i 'idewadi tomogo 'wainega, wata bani'odi tutuya de'e iaveta i tubutubuga vevine 'waidiega, we'e iaveta, vevine wata nani matatabuna ta souyeda Yaubada 'wainega.

13 'Omi me Kolinita 'wa na venua'ivina, 'ai'edi vavine i na vevelu'ui Yaubada 'waineye siwe 'unu'unudi kebu 'ana baniumaga, i lubwaineni 'alo kebu? **14-15** Kebu i da lubwaineni fai matatabuda 'ada vebae 'waidiega ta 'asetai

✝ **11:7:** Nag 1:26-27 ✝ **11:8:** Nag 2:21-23 ✝ **11:9:** Nag 2:18

vevine nava'audi manamanawedi 'atumaina, 'adi vaigavu, we'e iaveta nava'audi i na vemanawega 'eba bunumayaga. Yaubada vevine nava'audi i velediga 'unu'unudi 'adi talauma faifaina, begaidi taunidi wata 'unu'unudi i na baniumadi tafalolo faifaina. ¹⁶ 'Ai'edi tamu aitoi nuanuana i na ve'ikwayekwayega sauluvanina faifaina a na voneni a na vo, 'Ima tomata'aulelevo wata Yaubada yana 'Aila'a 'awalawa tulina tulina 'waidie yada sauluva 'aitamogana, tafalolo 'waineye 'ai'edi tamu vavine nuanuadi i na velu'ui 'alo Yaubada yana Vona i na lu'ivona, 'unu'unudi i na baniumai."

Me Kolinita Iesu yana 'ani i 'ivesakoi.

¹⁷ Tutuya de'e tamu nani faifaina a na awave'eda'eda 'waimie, siwe naninina faifaina kebu a na awa'ai'aimi, fai tutuyanina 'wa vava'auta 'ada Toveimea Iesu yana 'ani 'ana 'eba nuave'avina faifaina kebu 'aivaita 'wa da veveluagaiga, we'e mogitana vita 'wa veveluagai. ¹⁸ ♦Nagamidiotoga a na vonemi, tamu valami a nogai i vo, Me Kolinita tafalolo faifaina i mimiava'auta bei i veve'ikwayekwayega wata i lalau'idi." Valanina faifaina sai'af o a ve'awamogitana. ¹⁹ We'e yami lau'idinidi 'waidiega 'ada fata ta na 'asetadi egavo yadi nuanua tonovidi. ²⁰ Tutuyanina 'wa vava'auta 'ada Toveimea Iesu yana 'ani 'ana 'eba nuave'avina faifaina, kebu 'aninina faifaina 'wa da vava'auta, 'aniotoga faifaina 'wa vava'auta. ²¹ Tutuyanina 'wa vava'auta taunina taunina

❖ **11:18:** 1 Kol 1:10-12

'ana'ana i mimaiedi, siwe 'ani 'waineye 'wa 'ani-tala'ubu'ubuta, begaidi 'ifwaimi 'ami'ami siaidi 'wa laselase we'e 'ifwaimi ufa toketokena 'wa toke 'wa yemuyemu nuami i lugaugaudi. ²² 'Omi ma yami vanuga bei 'wa da 'ani-vagata, siwe yami sauluvanina 'ana 'isa 'wa da vo kebu yami vanuga. Yami sauluvanina 'wainega Yaubada yana 'Aila'a kebu 'wa da ve'ililibuyedi wata emiavo 'adi'adi siaidi 'wa 'ani-tala'ubu'ubuidi i bubunumayaga. Bani'odi a na voneyedyi 'waimie? Igodi 'wa vo, I na subiama." Kebu tamu sai'afu a na subiama yami sauluvanina faifaina.

Iesu yana 'ani 'ana sauluva mogitana.

²³⁻²⁴ ☩ Basenadi 'ada Toveimea Iesu yana 'ani 'ana 'eda'eda mogitana taunina 'waikuye i ve, mulieta venina a lu'ivona 'waimie. A vonemiga side bani'odi. Lovananina 'waineye Iudasa 'ada Toveimea Iesu i 'e'etogiluveni 'ana tovedumwe'ai'ai 'waidie, Iesu 'ani'ani i 'ewai, i vekaiwa Yaubada 'waineye, mulieta i 'ivivia i 'a'avana yana tovetutuyamavo i vonedi i vo, 'Ani'ani de'e, 'asa'aiana tomogoku, a tauyeni faifaimi. Tutuya fuedi side bani'odi 'wa na 'ani'aniedi 'aku nuave'avina faifaina." ²⁵ ☩ 'Ani i 'a'ava, wata bani'odi oine ma vedina i 'ewai i vonedi i vo, Oine de'e ma vedina 'asa'aiana dayagiku i na ilolo faifaimi bega yaku wafanina 'wainega Yaubada yana Veakutagona 'Ivauna basenadi faifaina i vona'awaufaufa i na velamu 'waimie. Tutuyanina de'e bani'odi 'wa na yemuyemuga nika 'wa na nuaniku." ²⁶ ☩ De'e

✩ 11:23-24: Lom 15:2 ✩ 11:25: 1 Kol 8:4-13; Ibu 9:18-20

✩ 11:26: Same 24:1

bani'odi Iesu i voneyediga, begaidi 'ada Toveimea Iesu yana 'ani 'waineye, 'wa na 'ani'ani wata 'wa na yemuyemu, 'wa veve Iesu i wafa faifaimi. Tutuya fuedi 'wa na 'i'idewai i na nagoga 'ada Toveimea Iesu i na vila-vaitugani.

'Ai'edi aitoi kebu i na ve'ililibuga Iesu yana 'ani 'waineye, vematavuloga i na veluagai.

²⁷ Fai Iesu sakalameni 'ana 'eda'eda mogitana i veleda, begaidi 'ai'edi aitoi kebu ma yana ve'ililibu 'ada Toveimea Iesu yana 'ani i na 'ania 'alo 'ana vedi 'wainega i na yemu, tomogonina 'akonadi i sakona, 'wa da vo Iesu tomogona wata dayagina i da 'ivekokovidi. ²⁸ \diamond Begaidi i lubwaineni tomotoga 'aitamogana 'aitamogana nagami taunina i na nuani bega yana nuanua wata yana sauluva i na tonova, mulieta Iesu yana 'ani i na 'ani wata 'ana vedi 'wainega i na yemu. ²⁹ Fai 'ai'edi aitoi i na 'animo wata i na yemumo, we'e kebu i na venua'ivinaga 'ada Toveimea Iesu tomogona wata dayagina faifaina, tomogonina yana 'ani wata yana yemu 'waidiega vematavuloga i na veluagai. ³⁰ Fai fuemi kebu 'wa da vevenua'ivina 'ani 'waineye begaidi 'ifwaimi 'wa viga, 'ifwaimi tomogomi i mwea, wata 'ifwaimi 'wa wafa. ³¹ \diamond We'e 'ai'edi Iesu yana 'ani 'waineye, nagami taunida ta da nu-anida bega sauluva sakoidi ta da bailedi, 'ako kebu Yaubada vematavuloga i da veleveledaga. ³² \diamond Ta na sakosakonaga, Yaubada ma yana veimea vematavuloga i na veleveleda bega ta na nuavilada

\diamond **11:28:** 2 Kol 13:5 \diamond **11:31:** Kolos 3:17 \diamond **11:32:** Lom 14:13;
Ibu 12:5-6

yada sauluva i na tonova. Kebu nuanuana 'awaie ta na wafaotoga 'ana tovedumwe'ai'ai taiadi.

³³ [✡]Begaidi ekwavo, tutuyanina 'wa na vava'auta 'ani-veiana faifaina, kebu 'wa na 'ani-naganaga, emiavo 'wa na lukamasedi ma fuemiena 'wa na 'ani. 'Aninina i na 'a'avana, mulieta bei Iesu yana 'ani 'wa na 'idewai. ³⁴'Ai'edi aitoi i na lase bwaikina, i lubwaineni yana vanuge i da 'ani-vagata, mulieta taiadi 'wa da va'auta 'ani-veiana wata Iesu 'ana nuave'avina faifaidi. We'e 'ai'edi ma 'ana lase i na mai, 'aniotoga 'aisena faifaina i na nuanua, we'e Iesu 'ana 'eba nuave'avina kebu i na ve'ililibuyeni, vematavuloga i na veluagai Yaubada 'wainega.

Nani 'ifwaidi kebu a da veifufuyediga, bola a na wai 'waimie a na kiavetonovidi.

12

*'Ada veuveuta tulina tulina 'Anu'anunu
'Atumaina yana 'anivelena.*

¹ Ekwavo, tutuya de'e a na veifufu 'Anu'anunu 'Atumaina yana 'anivelena faifaidi, kebu nuanaku faifaidi 'wa na bavubavu. ² 'Akonadi 'wa 'asetai basenadi Iesu kebu 'wa da 'asetaiga yaubada-vekavekali i veveimeyemi. Seitani numami i 'ewadi bega i vevekaliemi 'wa 'odu'odu yaubada-vekavekali 'waidie, naninidi kebu 'adi fata i na welava. ³ Fai basenadi 'waidie 'wa 'odu'odu wata fai 'Anu'anunu 'Atumaina 'wa bavuyeni, nuanaku 'Anu'anununina faifaina a na awave'ede'edemi. 'Ai'edi aitoi Iesu i na yagaia 'eba 'isa 'Anu'anunu 'Atumaina kebu i da ageiga

[✡] **11:33:** 1 Kol 9:20-22

wata 'Anu'anununina kebu i da vonavona to-mogonina 'wainega. We'e 'ai'edi aitoi i na vo, Iesu mogitana 'aku Toveimea," 'eba 'isa 'Anu'anunu 'Atumaina i agei, yana 'alavelevelena 'wainega i vonavona.

⁴ 'Ada nuakalikali tulina tulina 'Anu'anunu 'Atumaina i veutada, siwe nuakalikalinidi 'adi to'anivelena 'aitamogana. ⁵ Yada folova 'adi 'eda'eda tulina tulina siwe matatabuda ta folofolova 'ada Toveimea 'aitamogana faifaina. ⁶ Yaubada, toketokena tulina tulina i veleda bega ta folofolova faifaina, siwe matatabuda yada toketokena lamudi 'aitamogana.

⁷ [✡]'Anu'anunu 'Atumaina taunina i sivemageseni 'ida tovetumaganavo 'aitamogana 'aitamogana 'waideye 'ada veuveuta 'waidiega, bega Keliso yana 'Aila'a ta na ve'ivaivaita. ⁸ 'Anu'anunu 'Atumaina yana 'anivelena tamu tomogo 'ana veuveuta, ma yana 'aseta Yaubada yana nuanua i na lulu'ivona 'waideye. We'e tamu tomogo 'ana veuveuta 'Anu'anununina 'wainega, 'aseta nani tulina tulina faifaidi i veleni bega 'ana fata i na awave'eda'eda 'waideye. ⁹ Tamu tomogo 'ana veuveuta yana vetumagana toketokena, we'e tamu tomogo i na 'i'ive'atumi toviga 'waidie, veuveutanidi 'Anu'anununina 'aitamogana yana 'anivelena. ¹⁰ Tamu tomogo 'ana veuveuta 'eba nuavogana wata 'eba nua'ewa i 'i'idewadi, tamu tomogo 'ana veuveuta Yaubada yana Vona i na lulu'ivona 'waideye, wata tamu tomogo 'ana veuveuta i veleniga 'ana fata i na venua'ivina 'atumaina tamu tomogo yana lu'ivona faifaina, voke i mai 'Anu'anunu 'Atumaina 'wainega,

'alo taunina yana nuanuayega 'alo yaiaina i agei bega i vona. Tamu tomogo 'ana veuveuta 'Anu'anunu 'Atumaina yana 'alavelelevelena 'wainega i vonavona, bonanidi kebu i da 'asetadiga 'waidiega, siwe taunina kebu i da 'asetai ava'ai i vonevoneyeni. Mulieta tamu tomogo 'ana veuveuta bonanidi kebu i da 'asetadiga i na sisiviladi nika Yaubada yana vona 'ana 'aseta i na souyeni 'waideye. ¹¹ Veuveutanidi matatabuna 'adi to'anivelena 'aitamogana, taunina 'Anu'anunu 'Atumaina, 'aisena yana nuanua 'wainega i 'a'anivelena tomotoga 'aitamogana 'aitamogana 'waideye.

'Ida Keliso yana 'Aila'a 'alo Tomogona.

¹² [◊]Tomogoda 'aitamogana, siwe du'u fuedi. Du'u fuedi siwe i luvetubama tomogo 'aitamogana i souyeni. Wata bani'odi 'ida Keliso 'ana tovetumagana fueda, siwe ta luvetubama bega 'ida Keliso Tomogona i souyeni. ¹³ [◊]Fai Yaubada i bafitaisoda 'Anu'anunu 'Atumaina 'wainega 'ida Keliso yana 'Aila'a 'alo Tomogona 'aitamogana. Avinodi 'ifwaida me Diu, 'ifwaida mali tomotoga, 'ifwaida tofolova-maimaiga, wata 'ifwaida kebu 'ada toveimeaga, siwe Yaubada 'Anu'anunu 'Atumaina i tauyeni, 'Anu'anununina 'aitamogana matatabuda i ageda.

¹⁴ Tomogoda kebu du'u 'aitamogana, du'u fuedi. ¹⁵ 'Ai'edi tamu tomotoga 'agenma ma 'awanaga bega i da vona i da vo, Yau kebu nima, begaidi de'e tomogonina yau kebu tamu du'una," yana vonanina 'wainega kebu i da 'awa'idia. ¹⁶ Wata

[◊] **12:12:** Lom 12:4-5 [◊] **12:13:** Gal 3:28

'ai'edi tomogonina tanigana ma 'awanaga bega i da vona i da vo, Yau kebu mata, begaidi de'e tomogonina yau kebu tamu du'una," yana vonanina 'wainega kebu i da 'awa'idia. ¹⁷ 'Ai'edi tomogoda matatabuna mata, ava'aiega ta na nogaya? Wata 'ai'edi tomogoda matatabuna taniga, ava'aiega ta na yaoga? ¹⁸ Siwe Yaubada kebu tomogoda bani'odi i da 'idewadi. Tomogoda du'una tulina tulina i yatodi yana nuanua i lubwaineniga bani'odi. ¹⁹ 'Ai'edi du'u 'aitamogana, ava'ai 'ana 'atumaina? Kebu 'ana fata du'u 'aitamogana 'wainega tomotoga i na souyen'i. ²⁰ We'e mogitana, du'u fuedi, i luvetubama bega tomotoga 'aitamogana.

²¹ 'Ai'edi tamu tomotoga matana ma 'awanaga kebu i na vo, 'Omu nima, kebu nuanuaku, nani matatabuna 'akonadi 'aku fata." Wata 'unu'ununa kebu i na vo, 'Omu 'age, kebu nuanuaku, nani matatabuna 'akonadi 'aku fata." ²² We'e mogitana, du'udanidi yada nuanua 'waidie ta vo, Mweadi," siwe yadi folova bwaikidi, 'ai'edi kebu i da 'eno'enoviga 'ako yada mia i da vita. ²³ Wata du'udanidi yada nuanua 'waidie ta vo, Nani-'avo'avovo," siwe ta 'i'isave'avinadewadi wata du'udanidi kebu nuanuada ta na sivemagesediga, ma yada ve'ililibu ta givegivedi. ²⁴ We'e du'u 'adi 'isa 'atumaidi, 'waideye kebu 'eba bunumayaga, kebu ta da babaniumadiga. Yaubada tauniotogina du'u i luvetubamidi bega du'unidi ta nuani nani-'avo'avovo 'alo 'adi 'isa kebu 'atumaidiga ma 'adi ve'ililibu, ta 'i'isave'avinidi. ²⁵ Fai Yaubada tomogoda i luvetubami bega kebu 'ana fata tamu du'u

'aiseotogina i na mia'eni, we'e mogitana du'u tulina tulina ma ediaovo i na ve'ivaivaita. ²⁶ Ai'edi du'u tamu ilagi i na veluagai, du'u 'ifwaidi taiadi vitanina i vebaedi, wata 'ai'edi du'u tamu 'ana subia i na veluagai, du'u 'ifwaidi taiadi i na sosoana.

²⁷ ✽Yaku vonanina 'ana 'aseta side bani'odi. 'Omi 'aila'animi 'asa'aiana Keliso Tomogona, we'e 'aitamogana 'aitamogana du'una 'omi. ²⁸ ✽Keliso Tomogona 'alo yana 'Aila'a nageneye, Yaubada folova tulina tulina i veutada side bani'odi.

Folovanina i 'edakumetaga tomata'aulelevo,

'Ana veluga, Yaubada yana Vona 'ana tolu'ivonavo,

'Ana vetonu, Yaubada yana nuanua tonovidi 'adi tovevo,

'Ifwaidi i venua'ivinedi bega 'eba nuavogana wata 'eba nua'ewa i na 'i'idewadi,

'Ifwaidi toviga i na 'i've'atumaidi,

'Ifwaidi i venua'ivinedi i veto'aivaita ediaovo tovetumaganavo 'waidie,

'Ifwaidi i veto'edakumeta Keliso yana 'Aila'a 'waideye,

'Ifwaidi i venua'ivinedi bega 'Anu'anunu 'Atumaina yana 'alavelevelena 'wainega i na vonavona, bonanidi kebu i da 'asetadiga 'waidiega.

Side bani'odi Yaubada yada folova tulina tulina i veutada. ²⁹⁻³⁰ Yaubada tomogoda i 'idewadiga kebu taniga'ava 'alo mata'ava, wata bani'odi 'ida Keliso Tomogona yada folova tulina tulina. I veutadaga kebu matatabuda

✽ 12:27: Lom 12:5 ✽ 12:28: Efe 4:11-12

ta da vetomata'aulele, kebu matatabuda ta da vetolu'ivona, wata kebu matatabuda ta da vetove. Kebu 'ana fata matatabuda 'eba nuavogana wata 'eba nua'ewa ta na 'idewadi, kebu 'ana fata matatabuda toviga 'waidie ta na 'i'ive'atumai, kebu 'ana fata matatabuda 'Anu'anunu 'Atumaina yana 'alavelevelena 'wainega ta na vonavona, bonanidi kebu ta da 'asetadiga 'waidiega, wata kebu 'ana fata matatabuda bonanidi ta na siviladi bega 'adi 'aseta mogitana i na souyedi. ³¹ [✡]Ada veuveuta 'Anu'anunu 'Atumaina 'wainega tulina tulina, siwe i lubwaineda ma yada dumwebika ta na tokemaigeda bega yana 'anivelena kumekumetadi ta na 'ewadi.

Siwe tutuya de'e a na veifufu tamu sauluva 'atumaiotogina faifaina, sauvananina 'ada veuveutanidi i vebwaika-'iawedi. Sauluvanina 'ana wagava nuakalikali

13

Nuakalikali

¹ 'Ai'edi 'aku fata tomia fwayafwaya bonadi tulina tulina 'waidiega a da vonavona, 'alo anelose bonadiega, siwe kebu a da nuakalikaliga, yaku vonanidi 'adi nogaya nani-'avo'avovo 'wa da vo a da kwagekwage 'alo a da lu'e'e'ela. ² 'Ai'edi 'aku fata Yaubada yana Vona a da lulu'ivona, 'ai'edi Yaubada yana nuanua givagivadi a da 'asetadi, 'ai'edi nani matatabuna a da 'asetadi, wata 'ai'edi yaku vetumagana toketokeotogina bega 'aku fata a da vona 'oya 'waidie i da

[✡] **12:31:** 1 Kol 14:1

nagoi tulidie, siwe kebu a da nuakalikaliga, yau bani'odi nani-'avo'avovo. ³ Naninidi 'waikuye i 'eno'enoviga, 'ai'edi matatabuna a da 'anivelenedi, voke wata tomogoku a da tauyeni wafa 'waineye tomotoga faifaidi siwe kebu a da nuakalikaliga, ava'ai 'ana 'atumaina 'wainega a na veluagai?

⁴ [☆]Tonuakalikali kebu i da nuasako-matayo'o, i totokemaigamo wata ma yana nuakalikali i 'a'aivaita. Tonuakalikali kebu i da ve'unumagigi, kebu taunina i da awa'ai'aia wata kebu i da nunualaka. ⁵ Tonuakalikali i veve'ililibu, kebu taunina 'aisena faifaina i da nuanua, kebu i da logilogi, wata tomotoga yadi sakona 'waineye kebu i da nuanuanidi. ⁶ [☆]'Ai'edi tamu aitoi i na sakonaga, tonuakalikali kebu faifaina i na sosoana, we'e mogitana sauluva tonovidi faifaidi i sososoana. ⁷ [☆]'Ai'edi tamu tomogo i na vesauluva sakoina tonuakalikali 'waineye, i na tokemaigeni kebu i na veveifufu-vuvueni, tutuya matatabuna i na vetumagana tomogonina tomogo 'atumaina, i na nuani mogitana bega i na lulukamata yana sauluva i na veve'atumai, wata kebu tamu tutuya tomogonina i na baileni.

⁸ 'Ada veuveuta tulina tulina 'Anu'anunu 'Atumaina yana 'anivelena, 'awaie i na 'a'ava, we'e nuakalikali kebu i na 'a'ava i na 'eno-vagata. Vetolu'ivona Yaubada yana Vona faifaina i na 'a'ava, 'Anu'anunu 'Atumaina yana 'alavelelena bega tomotoga bonadi tulina 'waidiega i vonavona i na 'a'ava, wata 'aseta 'adi tokiavemageta yadi folova i na 'ailove.

[☆] **13:4:** Lom 13:10 [☆] **13:6:** Lom 12:9 [☆] **13:7:** 1 Fit 4:8

9 'Ada veuveutanidi i na 'a'ava fai tutuya de'e Yaubada 'ana 'aseta 'waideye sai'afu, wata yada lu'ivona faifaina kebu ta da veveifufu-dewedi.
10 Siwe 'awaie Yaubada nani matatabuna i na sivemagese'a'avedi wata i na 'idewa'a'avadi nika bei naninidi sai'afu, i na savovola.

11 Side bani'odi. Basenadi siaikuye, yaku vona, 'aku vebae wata yaku nuanua yavayavava bani'odi. We'e tutuya de'e a taulaiga, yaku 'aseta i vebwaika wata sauluva yavayavava a bailedi.
12 [✡]Wata bani'odi tutuya de'e yada 'aseta Yaubada faifaina siaina, 'wa da vo ta da 'isa-ganuganuyeni, we'e 'awaie ta na vemaigilisa'isa. Tutuya de'e yaku 'aseta Yaubada faifaina sai'afu, 'awaie a na 'asetaothi yau tutuya de'e i 'asetakuga bani'odi.

13 Veuveutanidi 'Anu'anunu 'Atumaina yana 'anivelena 'awaie i na 'a'ava, we'e nani bwaikidi 'aitonu i na 'eno-vagata. Yada vetumagana Yaubada 'waineye, ta nuani mogitana bega ta lulukamata naninidi 'atumaidi i na 'i'idewadi faifaida, wata nuakalikali. Siwe 'aitonunidi 'waidiega nuakalikali nani bwaikaotogina.

14

Bona ma 'ana 'asete 'eba 'aivaita.

1 [✡]Ekwavo, nuanuaku nuakalikali 'waimie i na vebwaika, wata ma yami dumwebika 'wa na tokemaigemi bega 'ami veuveuta 'wa na veluagadi 'Anu'anunu 'Atumaina 'wainega, we'e mogitana veuveutanina bwaikina faifaina 'wa na lauala bega 'ami fata Yaubada yana Vona 'wa na lulu'ivona 'Anu'anunu 'Atumaina yana

[✡] **13:12:** 1 Ion 3:2 [✡] **14:1:** 1 Kol 12:31, 14:39

awave'eda'eda 'wainega. ² Tomotoga 'ifwaidi 'adi veuveuta 'Anu'anunu 'Atumaina yana 'alavelevelena 'wainega i vonavona, bonanidi kebu i da 'asetadiga 'waidiega, siwe taunidi kebu i da 'asetai ava'ai i vonevoneyeni. Tomotoganidi i vonavonaga, kebu tomotoga 'waidie fai kebu tamu aitoi i da 'asetai, we'e mogitana i vonavona Yaubada 'waineye. Yaubada yana nuanua givagivadi i veveifufuyedi 'Anu'anunu 'Atumaina yana 'alavelevelena 'wainega. ³ We'e tomotoganidi i vetolu'ivona Yaubada yana Vona faifaina i vonavona tomotoga 'waidie bega yadi vetumagana i na vetoketoke, i na kiavefa'alidi wata i na kiavesosoanidi. ⁴ 'Ai'edi aitoi 'Anu'anunu 'Atumaina yana 'alavelevelena 'wainega i vonavona, bonanidi kebu i da 'asetadi 'waidiega, tomogonina 'aiseotogina 'aivaita i veveluagai yana vetumagana faifaina, we'e 'ai'edi aitoi Yaubada yana Vona i na lulu'ivona, Keliso yana 'Aila'a matatabumi 'aivaita 'wa na veluagai nika yami vetumagana i na vetoketoke.

⁵ Nuanuaku matatabumi 'Anu'anunu 'Atumaina yana 'alavelevelena 'wainega 'wa da vonavona bonanidi kebu 'wa da 'asetadi 'waidiega, siwe wata nuanuaku bwaikina Yaubada yana Vona faifaina 'wa da vetolu'ivona. Folovanidi 'adi 'ailuga, siwe vetolu'ivona folova bwaikaotogina, we'e tomotoganidi i vonavona bonanidi kebu i da 'asetadi 'waidiega, yadi folova sai'afu bwaikina. 'Ai'edi tomotoganidi 'Anu'anunu 'Atumaina yana 'alavelevelena 'wainega i na vonavona, mulieta tamu tomogo 'ana veuveuta 'Anu'anunu 'Atumaina 'wainega i

na siviladi nika Keliso yana 'Aila'a matatabumi 'aivaita 'wa na veluagai, bei yadi folova 'ana 'atumaina i na souyeni.

Ta na tafalolo taunida bonadega

⁶ Ekwavo, tutuyanina a na wai 'waimie, 'ai'edi 'Anu'anunu 'Atumaina yana 'alavelevelena 'wainega a na vonavona siwe bonanidi kebu 'wa na 'asetadiga, ava'ai 'ana 'atumaina? We'e 'ai'edi a na wai, naninidi Yaubada i sivemagesedi 'waikuye a na lu'ivona 'waimie, 'alo naninidi Yaubada nuanuana 'wa na 'asetadi a na ve 'waimie, 'alo yana Vona a na lu'ivona 'waimie, 'alo a na awave'ede'edemi, mogitana 'aivaita 'wa na veluagai, nika 'ana fata yami vetumagana i na vetoketoke. ⁷ I lubwaineda taunida bonadega ta na vonavona bega Yaubada yana nuanua ta na 'asetadi, begaidi 'ifwaidi 'eba 'isa a na velemi. 'Umo wata mafa kebu ma yawaidiga, siwe ma bonadi, begaidi 'ai'edi to'umo kebu i na 'umo-dewaga, kebu 'ana fata tamu aitoi nuana i na 'ewai. Wata bani'odi 'ai'edi mafa kebu i na nike-dewaiga i na lu'e'e'elimo, kebu tamu aitoi i na mai va'auta faifaina. ⁸ Wata 'ai'edi evulega kebu i na yuve-'atumaia, kebu 'ana fata tomotoga i na va'auta folova faifaina. ⁹ 'Omi wata bani'odi, 'ai'edi 'wa na vonavona, siwe kebu tamu aitoi bonami i na 'asetai, bani'odi i na munega nuana i na magetai? 'Ana 'isa 'wa da vo 'wa da vonavona 'awasasa'aveye. ¹⁰ Tomia fwayafwaya bonada fueotogidi, siwe 'aitamogana 'aitamogana ma 'adi to'aseta. ¹¹ We'e 'ai'edi aitoi i na vonavona 'waikuye, siwe bonana kebu a na 'asetaiga, tomogonina 'waikuye taunina

wakawaka, wata tomogonina 'waineye yau 'wa da vo wakawaka. ¹² ✝'Omi wata bani'odi, ava'ai bonaga emiavo i na 'asetadi, bonanina 'wainega 'wa na vonavona 'waidie. Nuanuami bwaikina 'ami veuveuta 'Anu'anunu 'Atumaina i na velemi, siwe i lubwainemi veuveutanidi 'waidiega Keliso yana 'Aila'a 'wa na kiavetoketokedi, faifaidi ma yami dumwebika 'wa na vetafewa bega 'wa na 'ewadi.

¹³ Fai nuanuada tovetumagana ta na kiavetoketokeda, bega 'ai'edi tamu tomogo 'Anu'anunu 'Atumaina yana 'alavelevelena 'wainega i na vonavona, bonanidi kebu i da 'asetadi 'waidiega, i lubwaineni i na velu'ui 'Anu'anununina tamu veuveuta i na veleni nika 'ana fata yana vonanidi i na kiavemagetadi. ¹⁴ 'Ai'edi 'Anu'anunu 'Atumaina yana 'alavelevelena 'wainega a na velu'ui tamu bona tulina 'wainega, 'anu'anunukuyega a na vevelu'ui, siwe ava'ai a na vonevoneyeniga kebu ma 'ana 'asetaga. ¹⁵ ✝Vetuma bani'odi a na velu'uidi? Tamu tutuya 'anu'anunukuyega a na velu'ui, tamu tutuya a na velu'ui yaku 'aseta 'wainega bega fuedi i na 'aseta. Wata bani'odi, tamu tutuya a na lei-subisubia 'anu'anunukuyega tamu bona 'wainega, tamu tutuya yaku 'aseta 'wainega a na lei-subisubia. ¹⁶ 'Ai'edi tafalolo 'waineye 'Anu'anunu 'Atumaina yana 'alavelevelena 'wainega Yaubada 'wa na subisubiai tamu bona kebu 'wa da 'asetaiga 'wainega, tamu tomogo taiadi 'wa va'autaga i na nogai, kebu 'ana fata yami velu'uinina faifaina i

✝ **14:12:** Efe 4:12 ✝ **14:15:** Efe 5:19

na vo, Vona mogitana yaku nuanua bani'odi," fai ava'ai 'wa vonevoneyeniga i bavuyeni. **17** Yami vekaiwanina voke 'eba nua'ewa, siwe fai tomogonina kebu i da 'asetai, 'waineye kebu tamu ava'ai 'ana 'atumaina.

18 A vekaiwa Yaubada 'waineye fai tutuya fuedi 'aisekuye a vonavona 'Anu'anunu 'Atumaina yana 'alavelevelena 'wainega bonanidi kebu a da 'asetadiga 'waidiega, we'e 'omi matatabumi sai'af. **19** 'Ai'edi tafalolo 'waineye yaku vona kebu fuediga siwe tomotoga 'aivaita i na veluagai yaku venina 'wainega, yau a na sosoana, we'e 'ai'edi vona fueotogidi 'waidiega a na ve 'Anu'anunu 'Atumaina yana 'alavelevelena 'wainega siwe bonaku i na bavuyeni, faifaina kebu a na sosoana.

Vona mali bonana 'waidiega faifaina 'wa na venua'ivina-'atumai.

20 ✽Ekwavo, vona mali bonana 'waidiega nuami i 'ewai, 'wa da vo 'omi yavayavava. Yavayavavanidi kebu 'adi fata i na venua'ivina-'atumai nani bwaikidi faifaidi, sauluvanina bani'odi 'wa na baileni, i lubwainemi yami nuanua i na kumagidi bega 'wa na venua'ivina-'atumai vona mali bonana 'waidiega faifaina. We'e yavayavava siaidi, yadi 'aseta sakona faifaina siaina, i lubwainemi 'wa da saladi. **21** ✽Basenadiotoga Yaubada i veifufu me Diu 'waidie taunidi bonadiega siwe i baila, yana nuanua kebu i da 'idewadi, begaidi tamu 'adi vona i 'eno'eno Yaubada yana Buki nageneye, 'Auvea i vo,

Mali tomotoga bonadiega a na vona me Diu 'waidie, wata tomotoga tulidi 'waidiega a na vona.

Siwe tutuyanina 'waineye kebu bonaku i na nogai basenadi bani'odi."

²² Vonanina mali bonana 'wainega tovedumwe'ai'ainidi yadi tugusa, i da 'iseni i da nuaviladi. 'Omi wata bani'odi, 'ifwaimi 'Anu'anunu 'Atumaina yana 'alavelevelena 'wainega 'wa vonavona bonanidi kebu 'wa da 'asetadiga 'waidiega, vonanidi kebu tovetumagana yada tugusa, Yaubada 'ana tovedumwe'ai'ai yadi tugusa, i da nogai i da nuaviladi. We'e 'ifwaimi 'Anu'anunu 'Atumaina yana awave'eda'eda 'wainega Yaubada yana Vona 'wa lulu'ivona, vonanina kebu 'ana tovedumwe'ai'ai yadi tugusa, we'e mogitana 'ida tovetumagana yada tugusa bega ta na nogai ta na ve'awamogitana.

²³ Begaidi 'ai'edi tovetumagana 'aila'animi 'wa na va'auta, matatabumi 'Anu'anunu 'Atumaina yana 'alavelevelena 'wainega 'wa na vonavona mali bonana 'waidiega, siwe 'ai'edi tovetumagana bavubavudi 'alo tomotoganidi kebu i da vetumaganaga i na lukuwa bonami i na nogai, nuadi i na voganidi i na vo, Mogitana matatabudi i ve'wawa'wawa." ²⁴ [✖]We'e 'ai'edi matatabumi 'Anu'anunu 'Atumaina yana awave'eda'eda 'wainega Yaubada yana Vona 'wa na lulu'ivona, tomotoganidi i na luku i na nogai nika yadi sakona tulina tulina i na nuanidi i na vo, Mogitana, 'ima tosakona." ²⁵ Yadi nogaya 'wainega yadi nuanua givagivadi i na sivemagesedi, ma yadi nuavilana

[✖] **14:24:** Ion 16:8

wata ma yadi ve'ililibu i na lumata'afufu Yaubada i na subai wata i na nubala i na vo, Mogitana Yaubada 'waimie i miamia."

Tafalolo faifaina 'ana 'eda'eda tonovina.

26 Ekwavo, tutuyanina 'wa na vava'auta tafalolo faifaina, nuanuaku side bani'odi 'wa na vesaulovedi. Tamu tomogo i na leisubisia, tamu tomogo Yaubada yana Vona 'wainega i na ve, tamu tomogo, naninidi Yaubada i sivemagesedi 'waineye i na lu'ivoneyedi, tamu tomogo, 'Anu'anunu 'Atumaina yana 'alavelelelena 'wainega i na vona, bonanidi kebu 'wa da 'asetadiga 'waidiega, we'e tamu tomogo, 'ana veuveuta 'Anu'anunu 'Atumaina 'wainega bonanidi i na siviladi nika Yaubada yana nuanua ma 'ana 'aseta. Naninidi de'e bani'odi, matatabuna 'wa na 'i'idewadiga bega 'omi Keliso yana 'Aila'a matatabumi 'aivaita 'wa na veluagai.

27 'Ai'edi 'ifwaimi nuanuami 'Anu'anunu 'Atumaina yana 'alavelelelena 'wainega 'wa na vona, bonanidi kebu 'wa da 'asetadiga 'waidiega, 'atumaina, siwe i lubwaineni 'aitamogana i na vona, 'alo 'ami 'ailuga 'alo 'ami 'aitonu. Kebu 'ami 'aitonuna 'wa na vona, 'aitamogana 'aitamogana i na vona, i na 'a'avana tamu tomogo i na siviladi bega 'ami 'aivaita 'wa na veluagai. **28** 'Ai'edi 'ami 'aila'a nageneye tosaivila kebu, siwe tamu tomogo nuanuana i na vonaga 'asa'aiana, kebu i na vona 'aila'a matamie, nuanega i na vona Yaubada 'waineye bona tulina 'waidiega.

29 [✖]Wata bani'odi, tolu'ivona 'ailuga 'alo 'aitonu Yaubada yana Vona i na lu'ivona 'waimie, we'e

'ifwaimi yadi vonanidi faifaidi 'wa na venua'ivina 'ana 'aseta mogitana faifaina. ³⁰ Siwe 'ai'edi tolu'ivona tamu i na vonavona, nika 'Anu'anunu 'Atumaina tamu nuanua i na sivemageseni tamu tonogaya 'waineye, tolu'ivonanina i na 'ailove bega tomogonina 'Anu'anunu 'Atumaina yana ve i na lu'ivona 'waimie. ³¹ Matatabumi ma 'ami veuveuta 'Anu'anunu 'Atumaina 'wainega, 'ami fata 'aitamogana 'aitamogana Yaubada yana Vona 'wa na lulu'ivona bega tovetumagana matatabumi 'wa na 'aseta wata 'wa na vetoketoke. ³²⁻³⁴ [✧]Kebu nuanuaku 'wa na ve'ilakalaka fai sauluvanina kebu Yaubada 'wainega i da mai, taunina nuanua bikana wata mia 'atumaina 'adi Yaubada. Begaidi yana tolu'ivonavo i lubwainedi i na toke taunidi i na veimeyedi bega kebu i na ve'ilakalaka.

Tutuyanina 'wa na va'auta tafalolo faifaina, nuanuaku Keliso yana 'Aila'a tulina tulina yadi sauluva 'wa na vetutuyameni bega vevine kebu i na vonavona yami miava'auta nageneye i na veve'wadamo. 'Adi talaboda i 'eno'eno bega kebu i na vonavonaga, wata kebu vevine iaveta i na veimeyedi fai bani'odi Yaubada yana Buki i vona. ³⁵ 'Ai'edi vevine nuanuadi i na velutoli tamu nani faifaina, i lubwainedi 'aikona yadi vanuge iaveta 'waidie i na velutoli nika i na 'asetai. We'e tafalolo 'waineye, 'ai'edi vevine i na vonavona, 'eba bunumayaga 'waideye. ³⁶ Awale veimeanina vevine faifaidi 'wa geugeuya? Yami sauluvanina 'wa da vo Yaubada yana veimea 'waimiega i da souyen'i, 'alo 'wa da vo 'aiseotogimi 'waimie yana vona i da 'eno'eno. I lubwainemi 'wa da

[✧] **14:32-34:** 1 Tim 2:11

vematayakayaka.

³⁷ 'Ai'edi aitoi yana nuanua 'waineye i na vo, Yau Yaubada yana Vona 'ana tolu'ivona," 'alo i na vo, Yau ma 'aku veuveuta 'Anu'anunu 'Atumaina 'wainega," 'ai'edi yana nuanua bani'odi, i da 'asetai veimeanina a kilumiga 'Auvea 'wainega. ³⁸ We'e 'ai'edi yaku vonanina i na baila, 'omi wata tomogonina 'wa na baileni, kebu bonana 'wa na nogai.

³⁹ Ekwavo, yaku vona 'adi 'aseta side bani'odi. Ma yami dumwebika 'wa na tokemaiga bega 'ami veuveuta 'wa na veluagadi 'Anu'anunu 'Atumaina 'wainega, nika 'ami fata Yaubada yana Vona 'wa na lulu'ivona, we'e tomotoganidi 'Anu'anunu 'Atumaina yana 'alavelelevelena 'wainega i vonavona mali bonana 'waidiega kebu 'wa na talabodedi. ⁴⁰ [❖] Siwe tutuyanina 'wa na va'auta tafalolo faifaina, yami sauluva 'wa na 'isave'avinidi bega naninidi i lubwainemiga 'wa na 'i'idewadi wata 'eda'eda tonovineamo 'wa na tafalolo.

15

Keliso wafayega i tovoi.

¹ Ekwavo, tutuya de'e nuanuaku nuami a na tolinuata'idi Iesu Keliso Valana 'Atumaina faifaina. Valanina basenadi a lau'age 'waimie nuanuami, 'wa tauyemi 'waineye, wata Valanina 'wainega 'wa vetumagana bega 'wa tovotovoi fa'alina. ² Wata 'ai'edi Valanina 'Atumaina a lu'ageyeniga 'waimie 'wa na toke 'wa na 'ive'avina-vagaseni, 'ita'ital'i 'wa na veveluagai.

[❖] **14:40:** 1 Kol 14:32-33

Siwe 'ai'edi kebu taunimi 'wa da tauyemiga Valanina 'waineye 'ako yami vetumagana nani'avo'avovo, wata 'ako 'ita'ita'inina kebu 'wa da veluagai.

3 [☆]'Wa na nuani venina a velemiga a 'ewai Keliso 'wainega siwe bwaikaotogina wata kumanina i kumetaotoga Valanina i vo, Keliso i wafa yada sakona faifaidi, basenadi bani'odi i vona-vagata Yaubada yana Buki nageneye. **4** [☆]We'e i wafaga i tavuni, 'aiata 'ana vetonu 'waineye Yaubada i sive-tovoia wafayega, basenadi bani'odi i vona-vagata Yaubada yana Buki nageneye." **5** [☆]Tutuyanina i tovoi wafayega taunina i sivemageseni Fita 'waineye, mulieta yana tomata'aulelevo 'waidie. **6** Wata tamu tutuya taunina i sivemageseni tovetumaganavo fuedi 'waidie, 'adi 'aila'a bani'odi 500 i 'iaweni, edavonidi fuedi 'asiau ma yawaidi i miamia, we'e 'ifwaidi 'akonadi yawaidi i 'a'ava. **7** Mulietta i souyeni Iemesa 'waineye, wata tamu tutuya taunina i sivemageseni yana tomata'aulele matatabuna 'waidie. **8** [☆]Yana souyagi 'ana 'eba ve'a'avaotoga yau 'waikuye. 'Ai'edi vavine ma kamodi siwe yadi 'aiata mogitana kebu i na veluagaiga, natudi i na tubuga-matayo'oga, yawaidi i na lovoga. Yau wata bani'odi, fai yau tosakona tomotoga i vo, Kebu 'ana fata i na vetumagana Keliso 'waineye bega i na tubuve'ivau," siwe Keliso i 'ive'avina-matayo'oku nika bei a tubuve'ivau Keliso yana 'Aila'a 'waineye, yawaidi i lovoga.

9 [☆]Mogitana yau tosakona fai basenadi Yaubada

[☆] **15:3:** Ais 53:8-9 [☆] **15:4:** Fol 2:24-32; Luk 24:46 [☆] **15:5:**
Luk 24:33-34,36 [☆] **15:8:** Fol 9:3-6 [☆] **15:9:** Fol 8:3

yana 'Aila'a i vetumaganaga Keliso 'waineye, vita a veleveledi. We'e tomata'aulele matatabudi 'waidiega yau a vemuliotoga bega 'ai'edi i na golegoleku i na vo, Tomata'aulele," kebu i da lubwaineneni. ¹⁰ [◊]Siwe Yaubada ma yana nuakalikali i vesauluva 'atumaina 'waikuye a vetomata'aulele Keliso faifaina wata yaku sauluva i vetuli, we'e yana nuakalikalina kebu a da ve'amubwadodoyeni, ma vuagina. Yaku folova toketokena Keliso faifaina yau a kumeta, mulieta 'ifwaidi tomata'aulele. A folofolovaga, kebu tau-niku yaku toketokena 'wainega, we'e mogitana Yaubada i vesauluva 'atumaina 'waikuye bega yana toketokena 'wainega a folofolova. ¹¹ We'e 'ai'edi tomata'aulele 'ifwaidi i lau'agega 'waimie 'alo yau, kebu tamu ava'ai, matatabuma yama nuanua 'aitamogana 'a lalau'age Iesu yana wafa wata yana tovi-vaitugana faifaidi, wata 'omi 'wa vetumagana Valanina 'waineye.

Keliso i sivetovoia, wata 'ida i na sivetovoida wafayega.

¹² Yama lau'age 'waimie Keliso yana tovi-vaitugana faifaina 'omi 'wa vetumagana, siwe awale 'ifwaimi 'wa vonavona 'wa vo, Towafa kebu 'adi fata i na tovoi-vaitugana wafayega?" ¹³ 'Ai'edi towafa kebu i na tovoi-vaitugana 'ako Yaubada Keliso kebu i da sivetovoia, i da wafavagata. ¹⁴ Wata bani'odi 'ai'edi Keliso kebu i da tovoi, 'ako 'ima 'a da lau'age-maimaiga wata yami vetumagana Keliso 'waineye nani'avo'avovo. ¹⁵ [◊]Wata, 'ai'edi Yaubada Keliso kebu

[◊] **15:10:** 2 Kol 3:5, 11:23 [◊] **15:15:** Fol 4:33

i da sivetovoiaga, 'ako yama lu'ivona Yaubada faifaina vekali fai 'a vo, Yaubada kumanina Keliso i sivetovoia wafayega." Siwe 'ai'edi Yaubada kebu tamu towafa i na sivetovoiaga, 'ako yama vonanina Keliso faifaina vekali. ¹⁶ Fai 'ai'edi towafa Yaubada kebu i na sivetovoidiga, 'ako wata bani'odi Keliso kebu i da sivetovoia. ¹⁷ 'Ida ta vetumagana ta vo, Keliso i wafa wata i tovoi-vaitugana yada sakona 'adi 'u'uma faifaidi," siwe 'ai'edi Keliso i da wafa-vagata 'ako kebu yami sakona i da 'u'umidi, Yaubada mataneye yami sakonanidi i da 'eno'eno, 'awaie vematavuloga 'wa da veluagai. ¹⁸ Wata 'ai'edi Keliso i da wafa-vagata, 'ako tovetumagana i wafaga i da wafaotoga. ¹⁹ 'Ida ta nuani mogitana 'awaie 'ita'ita'i ta na veluagai Keliso 'wainega, begaidi tutuya de'e yada vetumagananidi 'waidiega 'aivaita ta veveluagai. Siwe 'ai'edi Keliso kebu i da tovoiga, yada wafa 'waineye 'ako kebu 'aivaita ta da veluagai nika tomotoga 'ifwaidi i da fali-nuakalikalieda, i da vo, Nuakalikalidi, i vetumagana-maimaiga."

²⁰ [✡]We'e mogitana, Yaubada Keliso i sivetovoia wafayega, yada 'eba 'isa 'ida Keliso yana tomotoga wafa 'waineye ta na 'eno'enoga wata i na sivetovoida. Keliso i kumeta i tovoi, 'ida ta na vemuli. ²¹ [✡]Wafa i souyen'i fwayefwayeye tamu tomogo 'ana wagava Adama 'wainega, we'e tovi-vaitugana wafayega wata i souyen'i tamu tomogo 'wainega, 'ana wagava Keliso. ²² Basenadiotoga Adama Yaubada yana veimea i geuya bega yana sakonanina 'ana tutula wafa, wata bani'odi, fai to-

[✡] **15:20:** 1 Tes 4:14 [✡] **15:21:** Lom 5:12,18

mia fwayafwaya matatabuda Adama yana 'aila'a bega ta wafawafa. We'e 'ida tovetumagana ta mi-ave'itubamaga Keliso taiadi bega 'ida yana 'Aila'a, matatabuda Yaubada i na sivetovoida wafayega nika mia 'atumaina wata miamia-vagaina ta na veluagai. ²³ \diamond We'e Yaubada tutuya tulina tulina i yatodi tovoi-vaitugana faifaina, nagami Keliso i sivetovoia, mulieta yana vila-vaitugana 'waineye 'ida yana tomotoga i na sivetovoida. ²⁴⁻²⁶ \diamond I na sivetovoida i na 'a'avana, mulieta tutuya 'ana 'eba ve'a'avaotoga i na souyeni. Fai Yaubada nuan-ana, tutuyanina 'waineye Keliso ma yana toketokena i na velamu i na veimea i na nagoga nika i na vetoketoke 'ana gaviavo matatabuna 'waidie. Toveimea bwaikidi, tomotoga toketokedi, wata yaiaina, 'ana tovedumwe'ai'ainidi matatabudi i na leo'a'avadi. I na 'a'avana, 'eba ve'a'avaotoga 'waineye 'ana gavia tamu i na lusawe-vagaseni, 'ana wagava Wafa. Keliso i na vetoketoke naninidi matatabuna 'waidie, mulieta yana 'Eba Veimea i na 'anivelenedi Tamana Yaubada 'waineye. ²⁷ \diamond Veimeanina Yaubada Keliso i veleniga, faifaina tamu vona i 'eno'eno Yaubada yana Buki nagen-eye i vo,

Nani matatabuna i 'anivelenedi 'waineye bega i na veveimeyed."

Vonanina i vo, Nani matatabuna," 'ana nogaya 'wa da vo Keliso Yaubada i da veveimeyeni, siwe kebu, ta 'asetai Keliso kebu Yaubada i da veveimeyeni fai taunina veimeanina 'ana to'anivelena Keliso i veleni. ²⁸ Tutuyanina Keliso

\diamond 15:23: 1 Tes 4:16 \diamond 15:24-26: Mad 22:44; Ve 20:14 \diamond 15:27:

Same 8:6

nani matatabuna i na veveimeyedi, wata taunina i na tauyen Tamana yana veimea 'waineye, Tamananina nagami veimea i 'aniveleneni 'waineye, bega Yaubada 'aiseotogina ma yana veimea nani matatabuna tomotoga taiadi i na 'ilisave'avinida.

*Fai ta na tovoi wafayega bega ta na tokemaiga
Keliso faifaina.*

²⁹ 'Ifwaimi 'wa vo, Towafa kebu 'adi fata i na tovoi-vaitugana wafa 'wainega," bega yami nu-anuananina faifaina a na vonemi. Tamu yami sauluva 'ifwaimi bafitaiso 'wa 'ewa'ewai towafa faifaidi, siwe ava'ai 'ana 'atumaina? 'Ai'edi kebu aitoi i na tovoi wafayega yami nuanua bani'odi, awale bafitaiso 'wa 'ewa'ewai towafa faifaidi bega igodi 'wa vo, Yadi mia i na ve'atumai"?

³⁰ [☆]'Ima, 'a lalau'age Keliso faifaina, begaidi 'ana tovedumwe'ai'ai vita i velevelema nuanuadi i na luluvewafama. 'Ai'edi Yaubada kebu i na sive-tovoida Keliso taiadi, 'ako kebu 'a da lalau'agega wata 'ako kebu vita 'a da veveluagadi 'awasasa 'aitamogana 'aitamogana 'waidie. ³¹ Ekwavo, Yaubada i 'asetaku, a vona mogitana 'waimie 'aiata 'aitamogana 'aitamogana ilagi 'eba wafa a veveluagadi Keliso faifaina. Yaku vonanina wata yaku sosoana faifaimi, 'adi 'ailuga vona mogitana. Asosoanaga fai 'wa miave'itubama 'ada Toveimea Iesu Keliso taiadi. ³² [☆]Tutuya de'e Efeso 'waineye a miamia Keliso 'ana tovedumwe'ai'ai ma yadi nuasako i daba nuanuadi i na luvewafaku, yadi

[☆] **15:30:** 2 Kol 4:10-11, 11:26 [☆] **15:32:** Luk 12:19-20

nuasakonina 'wa da vo 'aisaya kasikasisidi taiadi a da vetalaga. 'Ai'edi fwayafwaya 'ana nuanua 'aisena faifaina a da tokemaigeku ilagi 'eba wafa 'waineye kebu tamu ava'ai 'ana 'atumaina 'waikuye. Siwe fai yada tovi-vaitugana faifaina a nuani, begaidi a tokemaigeku. 'Ai'edi Yaubada kebu towafa i na sivetovoidiga, 'ifwaidi tomotoga ta na saladi i vo, 'Ida wafawafada, ta na 'ani, ta na yemu, ta na wafa-vagata."

³³ Siwe kebu i na vekaliemiga. Tamu yada vona bwaikina i 'eno'eno i vo, 'Ai'edi tosakona taiadi 'wa na veiana, yadi sauluva i na vedamani, nika yami sauluva 'atumaidi i na 'ivesakodi." ³⁴ [◊]Nuanuaku yami nuanua i na tonova, yami sauluva sakoidi 'wa na bailedi. 'Ifwaimi Yaubada 'wa bavuyeni, 'wa da bunumayaga.

Tovi-vaitugana 'waineye tomogoda i na ve'ivau.

³⁵ Voke tamu aitoi i na velutoli i na vo, Yaubada bani'odi i na munega towafa i na sivetovoidi? 'Ai'edi i na sivetovoidiga ava'ai 'ana 'isa'isa tomogodi?" ³⁶ Yana velutolinidi 'ana nogaya 'wa da vo i da ve'wava'wava. Tutuyanina tamu waifei 'wa na bakuli i na tabo, siwe 'ai'edi tubutubuna kebu i na 'anikudaiga, 'alo kebu i na wafa, kebu 'ana fata vuaga 'wa na veluagai. ³⁷ 'Ai'edi tamu waifei 'wa na bakuliga bani'odi boada 'alo tamu 'ani'ani, siwe kebu ma 'ani'aninina 'wa da bakubakuli, waifei'avana. ³⁸ [◊]Waifeinina i na tabo i na nagoga vuagina i na souyeni Yaubada yana nuanua bani'odi, waifei tulina tulina taunidi vuagidi mogitana.

[◊] **15:34:** Luk 15:17-18 [◊] **15:38:** Nag 1:11

39 Wata bani'odi nani ma yawaidi tomogodi tulina tulina. 'Ida tomotoga tomogoda tulina, 'aisaya yaveyavegidi tomogodi tulina, 'aisaya daledaledi tomogodi tulina, 'aisaya ufayega tomogodi tulina wata 'aisaya 'ifwaidi tomogodi tulina.

40 Wata bani'odi, tomia abama tomogodi tulina wata tomia fwayafwaya tomogodi tulina. Tomia abamanidi tomogodi 'adi 'isa 'ana ve'atumai tulina wata tomia fwayafwayanidi tomogodi 'adi 'isa 'ana ve'atumai tulina. **41** Inala yana mageta 'ana 'isa tulina, weta'i yana mageta 'ana 'isa tulina, wata 'ubwana yadi mageta 'adi 'isa tulina, we'e 'ubwananidi 'aitamogana 'aitamogana 'adi 'isa tulina tulina.

42 Mogitana Yaubada nani 'aitamogana 'aitamogana 'adi 'isa tulina tulina i veledi, wata bani'odi 'awaie tovi-vaitugana 'waineye tomogoda tulina Yaubada i na veleda. Tutuyanina tamu waifei ta na tavuni i na tabo, siwe tubutubuna kebu i na 'anikudaiga 'alo kebu i na wafa, kebu 'ana fata tamu nani 'atumaina ta na veluagai. Wata bani'odi tutuyanina towafa ta na tavuni tomogona 'a'a'avina i na 'anikudai, siwe tutuyanina Yaubada i na sivetovoia wafayega, tomogona 'ivauna wata miamia-vagaina i na souyeni. **43** ☲Towafa ta na tavuniga tomogona 'ana 'isa i kibwa, siwe sivetovoi-vaitugana 'waineye 'ana 'isa 'atumaina. Ta na tavuniga tomogona mweamweana, siwe sivetovoi-vaitugana 'waineye tomogona toketokena. **44** 'Ida tomia fwayafwaya ma tomogoda yada

mia fwayefwayeye faifaina, begaidi towafa ta na tavuniga fwayafwaya 'ana nani ta na tavutavuni. Siwe tutuyanina Yaubada i na sivetovoia, tomogona 'ivauna 'anu'anununa yana 'eba mia 'atumaina, yana mia abame faifaina.

Matatabuda ta 'asetai tutuya de'e ma tomogoda yada mia fwayefwayeye faifaina, begaidi ta 'asetai 'awaie tomogoda 'ivaudi yada mia abame faifaina. ⁴⁵ \diamond Tomogodanidi faifaidi tamu vona i 'eno'eno Yaubada yana Buki nageneye i vo,

Tomotoga kumekumetana 'ana wagava Adama, Yaubada i 'idewai fwayafwaya 'wainega ma yawaina."

We'e Keliso, taunina 'wa da vo Adama vevemulina i mai, taunina 'anu'anunu, mia 'ivauna wata miamia-vagaina 'ana to'anivelena. ⁴⁶ Tomogoda yada mia abame faifaina kebu nagami ta da 'ewadi. We'e mogitana tomogoda yada mia fwayefwayeye faifaina nagami ta 'ewadi, tomogoda 'ivaudi abama faifaina 'awaiebei ta na veluagadi. ⁴⁷ \diamond Tomotoga kumekumetana 'ana wagava Adama, Yaubada i 'idewai fwayafwayayega, we'e Adama vevemulina taunina Keliso, abamega i mai. ⁴⁸ 'Ida tomia fwayafwaya yada mia i vesala tomogonina i 'idewaiga fwayafwayayega bani'odi, we'e 'ida Keliso yana tomotoga, kumanina i mai abamega, 'awaie taiadi abame yada mia i na vesala. ⁴⁹ Tutuya de'e 'ada 'isa'isa bani'odi tomogonina Yaubada i 'idewai fwayafwayayega, wata bani'odi

\diamond **15:45:** Nag 2:7; Ion 6:63 \diamond **15:47:** Ion 3:31

'awaie 'ada 'isa'isa kumanina i mai abamega bani'odi.

Iesu 'wainega ta na vetoketoke wafa 'waineye.

⁵⁰ \diamond Ekwavo, yaku vona 'ana 'aseta side bani'odi. Kebu 'ana fata tomotogaotogida ta na luku Yaubada yana 'Eba Veimea nageneye bega 'ada veuveuta ta na veluagai, wata kebu 'ana fata tomogoda 'a'a'avidi i na luku nani miamia-vagaidi yadi 'eba mia 'waineye.

⁵¹ \diamond Tamu Yaubada yana nuanua givagivana a na sivemageseni 'waimie. 'Ida tovetumagana kebu matatabuda ta na wafa, siwe tovetumagana matatabuda wafawafadi taiadi, Yaubada tomogoda i na 'ive'ivaudi ta na vetuli-matayo'o. ⁵² I na 'ive'ivau-matayo'odaga 'wa da vo matada ta da taulovogi 'alo tomuyoana i da kianamali. Tutuya 'eba ve'a'avaotoga 'waineye, Yaubada yana evulega ta na nogai, nika tovetumagana i wafaga Yaubada i na sivetovoidi tomogodi 'ivaudi yadi mia abame faifaina i na veledi, siwe miamia-vagaidi kebu i na wafa. We'e 'ida tovetumagana ma yawaida ta na miamiaga ta na vetulimo, tomogoda 'ivaudi ta na 'ewadi. ⁵³ \diamond Fai Yaubada nuanuana, tomogoda 'ivaudi abamega tomogoda 'a'a'avidi i na agedi, tomogodanidi 'ivaudi kebu 'ana fata i na 'anikudadi. Tomogoda 'ivaudi wata miamia-vagaidi tomogoda wafawafadi i na agedi. ⁵⁴ \diamond Tutuyanina ta na vetuli i na 'a'avana nika tamu vona Yaubada yana Buki nageneye 'ana mogitana i na souyeni i vo,

\diamond **15:50:** Ion 3:5-6 \diamond **15:51:** 1 Tes 4:15-17; Ve 11:15 \diamond **15:53:**
2 Kol 5:4 \diamond **15:54:** Ais 25:8

Yaubada i vetoketoke wafa 'waineye, i ve'a'ava-vagaseni."

55 ☆Wata tamu vona i vo,

Wafa, yamu 'eba vetoketoke ava'aibe? Yamu toketokena 'akonadi i 'a'ava.

Wafa, yamu 'eba vekasikasisi 'wainega vita 'u velevelema, ava'aibe? 'Akonadi i mwea."

56 ☆Fai Yaubada yana Ve'etoboda ta geugeudi ta sakosakona, we'e yada sakonanidi 'adi tutula wafa. Wafanina yana 'eba vetoketoke 'asa'aiana sakona. **57** ☆Siwe 'ada Toveimea Iesu Keliso 'ada vematavuloga wafa i tovoieni i vetoketoke 'waineye, wata yana 'aivaita 'wainega ta vevetoketoke. Naninidi Yaubada i 'idewadi, bega ta na vekaiwa 'waineye.

58 ☆Ekwavo, 'omi a nuakalikaliemi, fai 'awaie ta na tovoi-vaitugana, nuanuaku 'wa na tovoi fa'alina, yami vetumagana 'waidiega kebu 'wa na 'ivemweamweami. Ma yami dumwebika taunimi 'wa na tautauyemi 'Auvea yana folova 'waineye, 'akonadi 'wa 'asetai 'ai'edi yana toketokena 'wainega 'wa na folofolovaga faifaina, ma vuagina wata ma 'ana tutula.

16

*'Anivelena-maimaiga tovetumagana adi
'aivaita faifaina.*

1 ☆Tutuya de'e, nuanuaku a na veifufu yami 'anivelena-maimaiga faifaina, maninina

☆ **15:55:** Ose 13:14 ☆ **15:56:** Lom 6:23 ☆ **15:57:** Lom 7:24-25

☆ **15:58:** Fil 1:27; Gal 6:9 ☆ **16:1:** 2 Kol 8:1-7

'wainega Yaubada yana tomotoga i vewekowekomaga 'wa na 'ivaised. Tovetumagana 'aila'a tulina tulina 'awalawa Galetia nageneye yaku nuanua 'anivelena-maimaiga faifaina a vonedi i na 'idewai, 'omi wata bani'odi 'wa na 'idewai. ² 'Aiata Tafalolo 'aitamogana 'aitamogana yami mani 'ifwaidi 'wa na yatoyato 'anivelena-maimaiga faifaina. 'Wa na yatoyatoga, 'aitamogana 'aitamogana yana folova 'ana tutula 'ana 'etowava 'wainega, 'ai'edi tutula bwaikina, wata bwaikina i na yato, we'e 'ai'edi siaina, wata i na yato siaina. 'Wa na yayatovagata bega tutuyanina a na waiga nonogina i na 'eno'eno. ³ Tomotoga 'ifwaidi 'wa na venua'ivinedi maninina i na naweni faifaina, mulieta a na wai tomotoganidi yadi lubulubu a na kilumidi 'adi 'aseta wata 'adi aware'atumai faifaidi. I na 'a'avana a na vetunedi yami 'anivelena-maimaiga i na naweni Ielusalema i na 'aniveleneni tovetumagana i vewekowekomaga 'waidie. ⁴ 'Ai'edi i na lubwaineni yau a na nunago Ielusalema, tomotoganidi a na vonedi taiadi 'a na nagoi.

Faulo i na nago Kolinita, faifaina i veifufu.

⁵ [✡]Tutuyanina a na viwaiga, nagami 'awalawa Masidonia matatabuna 'waineye a na lauvivila, mulieta a na viwaina a na le'wa. ⁶ A na waiga voke sai'afu taiadi ta na yogomia, 'alo voke kaukau 'ana tutuya matatabuna bei taiadi ta na miamia, mulieta yami 'aivaita 'wainega a na tauya a na nagoi.

nago tamu 'atamana 'waineye. ⁷ Kebu nuanuaku 'isa'ava faifaina a na wai, begaidi nagami a na nago Masidonia, tutuyanina yaku folova i na 'a'ava a na wai 'waimie. 'Ai'edi 'Auvea i na tauyekuga, nuanuaku tutuya manamanawena taiadi ta na yogomia.

⁸ Siwe tutuya de'e a na miamia 'atamana Efeso, sakali bwaikina Fenitikosi 'ana 'aiata i na veluagai, mulieta a na wai. ⁹ [☆]A na miamiaga fai 'Anu'anunu 'Atumaina yana 'aivaita 'wainega me Efeso fuedi i nunuaviladi i vevetumagana Keliso 'waineye, wata Keliso 'ana tovedumwe'ai'ai fuedi yaku folova i 'l'ivesakoi begaidi a na miamia.

Faulo yana vona 'ana 'eba ve'a'ava.

¹⁰ [☆]'Ai'edi Timoti i na viwai i na le'wa 'waimie, kebu nuanuaku i na kololoyemi, ma yami sosoana 'wa na veianeni fai taunina i folofolova 'Auvea faifaina yau a folofolovaga bani'odi. ¹¹ [☆]Fai taunina 'Auvea yana tofolova, bega kebu tamu aitoi 'waimiega i na kibuya, taiadi 'wa na miamia mulieta yami 'aivaita 'wainega wata ma yana sosoana i na vilai i na mai 'waikuye. Edavo tovetumagana wata Timoti taiadi, faifaidi a lulukamata.

¹² [☆]We'e iada Afolosa a toke a vonevoneni nuanuaku i da wai i da fogemi edavo tovetumagana 'ifwaidi taiadi siwe i baila, kebu nuanuana tutuya de'e i na wai. Siwe tamu tutuya safailina 'waineye i na wai.

¹³ [☆]'Wa na 'isal'isa, taunimi yami sauluva 'wa na 'i'isave'avinidi, ma yami vetumagana 'wa na tovotovoi fa'alina, nuafoumi i na fa'alidi bega

[☆] **16:9:** Fol 19:1-2,8-10 [☆] **16:10:** 1 Kol 4:17 [☆] **16:11:** 1 Tim 4:12 [☆] **16:12:** 1 Kol 3:6 [☆] **16:13:** Efe 6:10

kebu 'wa na kololo Keliso 'ana tovedumwe'ai'ai 'waidie, wata 'wa na vevetoketoke. ¹⁴ Ava'ai 'wa na 'i'idewadiga, yami sauluva matatabuna nuakalikali.

¹⁵⁻¹⁶ [✡]Akonadi 'wa 'asetai 'awalawa Gulisi matatabuna nageneye Sitefana ma yana 'aila'a taunidi nagami i vetumagana Keliso 'waineye, mulieta tomotoga 'ifwaidi. Ma yadi dumwebika taunidi i tauyedi Yaubada yana tomotoga 'ada 'aivaita faifaina. Ekwavo, nuanuaku bwaikina ma yami ve'ililibu taunimi 'wa na tauyemi tomotoganidi 'waidie wata 'ifwaidi tomotoga 'waidie, kumanidiavo yadi sauluva bani'odi Sitefana ma yana 'aila'a. Wata nuanuaku taunimi 'wa na tauyemi tomotoganidi i toke i folova-vaita Keliso faifaina 'waidie.

¹⁷ Fai 'omi kebu taiadi ta da miamia a nunuavita, siwe edavo 'ifwaidi i maia 'waimiega i kiavesosoaniku, tomotoganidi Sitefana, Fotiuneto, wata Akaikasi. ¹⁸ [✡]Tomotoganidi i le'wai ni ka i kiavesosoaniku wata i kiavetoketokeku, 'omi wata bani'odi 'akonadi 'aivaitanidi 'wa veluagadi 'waidiega. Tomotoganidi de'e bani'odi i lubwainemi 'aila'a matadie 'wa na awa'ai'aidi.

Faulo yana 'alanuia.

¹⁹ [✡]Keliso yana 'Aila'a tulina tulina 'awalawa Eisia nageneye yadi vekaiwa i vetunedi 'waimie. Wata Akwila ma yana vavine Filisila wata tovetumagananidi i vava'auta yadi vanuge, ma fuedie ma yadi nuakalikali yadi vekaiwa i vetunei 'waimie 'Auvea 'ana wagavayega. ²⁰ Emiavo

[✡] **16:15-16:** 1 Kol 1:16; 1 Tes 5:12 [✡] **16:18:** Fmi 1:7 [✡] **16:19:** Lom 16:3-5

tovetumagana taiadi 'a miamianiga, wata yadi vekaiwa i vetunei 'waimie.

Emiavo tovetumaganavo 'wa na veluagadiga, ma yami nuakalikali 'wa na 'avalamaigidi.

²¹ Side bei yaku leta 'ana tokiluma a voneni i 'ailove, yau tauniku a na ve'a'avai. Yau Faulo de'e nimaku, a vekaiwa 'waimie.

²² ✽'Ai'edi aitoi 'ada Toveimea Keliso kebu i na nuakalikalieniga, Yaubada ma yana nuasako ve-matavuloga i na veleni i na wafaotoga.

Iesu, 'omu 'ama Toveimea, nuanuama 'u na mai-matayo'o.

²³ A vevelu'ui faifaimi, nuanuaku 'ada Toveimea Iesu ma yana nuakalikali i na vevesauluva 'atumaina 'waimie.

²⁴ 'Ida matatabuda Keliso yana tomotoga, begaidi a nuakalikaliemi bwaikina.

'Asa'aiana bani'odi,
Yau Faulo.

**YAUBADA YANA VONA'AWAUFAUFA 'IVAUINA
The New Testament in the Iamalele Language of Papua
New Guinea**

Nupela Testamen long tokples Iamalele long Niugini

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files
dated 9 Oct 2020

db771331-f438-5051-a7d5-80ea6197c078